

1 CORINTIOS

Pablo Corinto marãrẽ õãdoredea

¹ Yu Pablo, Sóstenes merã m̄sãrẽ õãdorea. Marĩp̄ gããmederosũta Jesucristo yure ãgũyare buedoreḡ beyepĩmi. Sóstenes Jesure b̄remugã, marĩyaguta ããrĩmi. ² Yu ãgũ merã m̄sã Corinto marãrẽ gojáa. M̄sã Jesucristore b̄remurã, ãgũ merã õãrõ ããrĩsĩã, Marĩp̄yarã ããrã. Marĩp̄ m̄sãrẽ, gajerã ããrĩpererogue marã marĩ Op̄ Jesucristore: “Iritamuka yure!” ãrĩ s̄er̄ãrẽ siudi ããrĩmĩ ãgũyarã ããrĩburo, ãrĩgũ. Jesucristo ãgũsã Op̄ ããrĩmi. Irasũ ããrĩmakũ, marĩdere marĩ Op̄ta ããrĩmi. ³ Marĩp̄ ããrĩnĩgũ, marĩ Op̄ Jesucristo m̄sãrẽ õãrõ iritamu, siuñajãrĩ merã ããrĩrikumakũ iriburo.

Marĩp̄ Jesucristo merã m̄sãrẽ õãrõ iritamumi, ãrĩ gojãdea

⁴ Ëm̄rik̄ yu Marĩp̄re usuyari s̄nĩkõãa Jesucristo iridea merã ãgũ m̄sãrẽ õãrõ iritamumakũ ããgũ. ⁵ M̄sã Cristo merã õãrõ ããrĩmakũ, Marĩp̄ m̄sãrẽ ãgũyamarẽ ããrĩpereri õãrĩrẽ s̄idi ããrĩmĩ. Irasiriḡ m̄sãrẽ õãrõ p̄emasĩrĩ merã ãgũyare gajerãrẽ weremakũ, irire masĩmakũ yãmi. ⁶ Marĩp̄ irire s̄igũ, yu m̄sãrẽ: “Cristo õãrõ iritamuḡkumi”, ãrĩderosũta irire iridi ããrĩmĩ. ⁷ Irasirirã marĩ Op̄ Jesucristo dupaturi aariburire yurã Marĩp̄ s̄ĩrĩrẽ opapeokõãa. ⁸ I ãm̄ peremakũguedere ãgũ turari merã m̄sãrẽ Jesucristore b̄remunĩmakũ iriḡkumi. Irasiriḡ marĩ Op̄ Jesucristo dupaturi aarimakũ, marĩrẽ

waja opamerã ããrĩmakũ irigũkumi. ⁹ Marĩpu, ĩgũ: “Ãsũ irigũra”, ãrĩdeare keoro irigũ ããrĩmi. ĩgũta musãrẽ beyedi ããrĩmĩ, ĩgũ magũ Jesucristo marĩ Opu merã õãrõ ããrĩburo, ãrĩgũ.

Pablo Corinto marãrẽ Marĩpuyarãrẽ: “Gãme dukawaribirikõãka!” ãrĩ gojadea

¹⁰ Yaarã, yu marĩ Opu Jesucristo dorederosũta musãrẽ ãsũ ãrĩ weregũra. Sũrosũ gũñarĩ merã werenĩka! Musã werenĩrĩ merã gãme dukawaribirikõãka! Usũyari merã werenĩ, sũrosũ gũñarĩ merã ããrĩrikũka! ¹¹ Yaarã, Cloéya wii marã yũre musã gãme werenĩ guaseorire werema. ¹² Musã ãsũ ãrĩ gãme guaseoyuro: “Gua Pabloyarã ããrã”, ãrĩ guaseoyuro. Gajerã: “Apoloyarã ããrã”, gajerã: “Pedroyarã ããrã”, gajerã: “Cristoyarã ããrã”, ãrĩ gãme guaseoyuro. ¹³ Irasũ ãrĩ gãme guaseobirikõãka! Marĩ Cristore buremurã ããrã. Irasirirã ĩgũ sugũyarãta ããrã. Gãme dukawarimasĩña máa. Yu, musãya ããrĩburire curusague boabosabiribu. Musã, yu wãĩ merã wãĩyesũbiribu. ¹⁴ Yu Marĩpũre: “Õãa” ãrĩ, usũyari sĩa. Yu musãrẽ deko merã wãĩyebiribu. Crispo, Gayosã direta wãĩyebu. ¹⁵ Irasirirã musã: “Gua Pablo wãĩ merã wãĩyesũnerã ããrã”, ãrĩmasĩbea. ¹⁶ Gajerãrẽ Estéfanaya wii marãdere wãĩyebu, ãrĩ gũñabu. Gajerãgue tamerãrẽ wãĩyebu, ãrĩmasĩbirikoa. ¹⁷ Cristo yũre wãĩyedoregu pĩbirimi. ĩgũ masakare tauri kere gapũre weredoregu pĩmi. Irire yũre pĩgu, masĩrĩmasã werenĩrõsũ werenĩdorebirimi. Yu, ĩgũsã irirosũ werenĩmakũ, masaka Cristo curusague boabosadeare

pémasĩbiribokuma. Irasirirã ĩgũ tauburire neõ masĩbiribokuma.

Cristo merã Marĩpũ turarire, ĩgũ masĩrĩrẽ masĩsũa, ãrĩ gojadea

¹⁸ Jesucristore bũremumerã peamegue béosũmurã, ĩgũ curusague boadea kerere pérã: “Pémasĩmerãya bueri ããrã”, ãrĩma. Marĩ ĩgũ tausũmurã gapure i kerere pémakũ, Marĩpũ ĩgũ turari merã marĩrẽ ĩgũrẽ bũremumakũ yámi.

¹⁹ Marĩpũya werenĩrĩ gojadea pũgue ãsũ ãrĩ gojasũdero ããrĩbú:

I ãmũ marã masĩrĩmasã ĩgũsã masĩrĩrẽ ubu ããrĩrĩ dujamakũ irigũra. Gajinorẽ ãmabéogu irirosũ ĩgũsã pémasĩrĩrẽ ãmagũra, ãrĩdi ããrĩmĩ Marĩpũ.✧

²⁰ Irasirirã: “Masĩpeokõãa”, ãrĩrã, ubu ããrĩrã dujama. Gajerã ĩgũsã gũñarõ buerimasãde irasũta dujama. I ãmũmarẽ õãrõ werenĩmasĩrãde irasũta dujama. I ãmũmarẽ: “Õãrõ masĩa”, ãrĩkererũpũ, Marĩpũ gapũ ĩgũsã masĩrĩrẽ ubu ããrĩrĩ dujamakũ yámi. ²¹ Marĩpũ masĩgũ ããrĩsĩã, i ãmũ marãrẽ ĩgũsã masĩrĩ merã ĩgũrẽ masĩmakũ iribiridi ããrĩmĩ. ãsũ gapũ ãrĩdi ããrĩmĩ. Jesucristoya kerere bũremurãrẽ: “Taugũra”, ãrĩdi ããrĩmĩ. ĩgũrẽ bũremumerã gapũ iri kerere pérã: “Pémasĩmerãya bueri ããrã”, ãrĩma.

²² Judío masaka iri kerere bũremumerã: “Marĩpũ turari merã gajino iri ĩmumakũ ĩãrãgue bũremurãkoa”, ãrĩma. Judío masaka ããrĩmerã griego masakade i ãmũma ĩgũsã masĩrĩ direta masĩdũama. ²³ Gũa gapũ Jesucristo curusague boadiya kerere werea. Judío masaka iri kerere

✧ 1:19 Is 29.14

pérã: “Ígũ guare taugũ meta ããrĩmi”, ãrĩma. Judío masaka ããrĩmerãde iri kerere pérã: “Pemasĩmerãya bueri ããrã”, ãrĩma. ²⁴ Marĩ gapũ Marĩpũ beyenerã ããrĩsĩã, iri kerere pérã: “Marĩpũ masĩgũ, turatarigũ ããrĩsĩã, Cristo iridea merã marĩrẽ peamegue waabonerãrẽ taugũkumi”, ãrĩ masĩa. Marĩ judío masaka, judío masaka ããrĩmerãde Cristore bũremurã ããrĩsĩã, irire masĩa. ²⁵ Cristore bũremumerã gapũ Marĩpũ Ígũ masĩrĩ merã, Ígũ turari merã iririre ãsũ ãrĩ gũñama: “Ubu ããrĩrĩ ããrã”, ãrĩ gũñama. Ígũsã irasũ ãrĩ gũñakerepũ, Marĩpũ masĩrĩ gapũ masaka masĩrĩ nemorõ õãrĩ ããrĩtarinũgãrĩ ããrã. Ígũ turari gapũ, masaka turari nemorõ ããrã.

²⁶ Yaarã, Marĩpũ musãrẽ Ígũyarã ããrĩdoregu siiuburo dupuyuro musã ããrĩrikũdeare gũñaka! Musã i ãmũ marã masĩrĩmasã, dorerimasã, oparã pũrã irirosũ ããrĩrã mérãgã ããrĩnerã ããrĩbũ. ²⁷ Marĩpũ, i ãmũ marã masĩrãrẽ gũyasĩũrõ taridoregu, Ígũsã pemasĩmerã ããrĩma, ãrĩrã gapũre beyedi ããrĩmĩ. Irasũ ããrĩmakũ, i ãmũ marã oparãrẽ gũyasĩũrõ taridoregu, ubu ããrĩrã gapũre beyedi ããrĩmĩ. ²⁸ Ubu ããrĩrã gapũre, masaka ããrĩhaña marĩrã gapũre beyedi ããrĩmĩ Ígũyarã ããrĩburo, ãrĩgũ. Oparã irirosũ ããrĩrã gapũre ubu ããrĩrã dujaburo, ãrĩgũ, irasiridi ããrĩmĩ. ²⁹ Irasirigũ neõ sugũ masakũ: “Yũ gajerã nemorõ masĩtarinũgãgũ ããrĩmakũ ããrĩgũ, Marĩpũ yũre beyedi ããrĩmĩ”, ãrĩmasĩbirikumĩ. ³⁰ Musãrẽ Marĩpũ basita Jesucristo merã õãrõ ããrĩmakũ iridi ããrĩmĩ. Irasirigũ Marĩpũ Cristo merã marĩrẽ Ígũyare masĩmakũ yãmi. Ígũ merã marĩrẽ: “Õãrã,

waja opamerã ããrĩma”, ãrĩ ããmi. Irasirirã marĩ ãgũyarã, peamegue waabonerã ãgũ tausũnerã ããrã. ³¹ Irasiriro Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Neõ sugũ: ‘Gajerã nemorõ masĩtarinũgãgũ ããrã’, ãrĩbirikõãburo. Irasũ ãrĩrõno irigũ marĩ Opũ gapũre: ‘Turatarigũ ããrĩsĩã, marĩrẽ õãtariro iridi ããrĩmĩ’, ãrĩburo”, ãrĩ gojasũdero ããrĩbũ.

2

Cristo curusague boadea kerere gojadea

¹ Yaarã, yũ musã pũrogue Marĩpũya kerere, masaka masĩbirideare buegũ ejagũ, masĩrĩmasã diasari werenĩrĩ merã buerosũ buebiribũ. ² Yũ musã merã ããrĩgũ: “Jesucristoya kerere, irasũ ããrĩmakũ ãgũ curusague boadea direta buegũra”, ãrĩ gũñabu. ³ Irasirigũ musã merã ããrĩgũ, ubu ããrĩgũ irirosũ péñabu. “Gajipoe irigũ yũ iri kerere õãrõ buemasĩbiribokoa”, ãrĩgũ, gũi naradari merã ããrĩkubũ. ⁴ Yũ musãrẽ iri kerere bũremumakũ gããmegũ, masĩrĩmasã werenĩrõsũ buebiribũ. Irasirirã, Marĩpũ turari, Õãgũ deyomarĩgũ iritamurĩ merã yũ musãrẽ iri kerere buemakũ pérã: “Diayeta ããrã”, ãrĩ bũremubũ. ⁵ “Masaka masĩrĩ merã ãgũsã gũare buemakũ bũremua”, ãrĩ gũñamakũ gããmebiribũ. “Marĩpũ, ãgũ turari merã gũare Jesucristoya kerere bũremumakũ yãmi”, ãrĩ gũñamakũ gããmegũ, irasũ buebũ musãrẽ.

Marĩ Õãgũ deyomarĩgũ iritamurĩ merã Marĩpũre masĩa, ãrĩ gojadea

⁶ Gũa musãrẽ Jesucristore õãrõ bũremurĩ oparãrẽ buerã, Marĩpũ wãro masĩrĩ sĩrĩ merã buea. Iri masĩrĩ i mũmũma meta ããrã. Irasũ ããrĩmakũ, i

ũmũ marã masakare dorerãya meta ããrã. I ũmũma ãgũsã basi masĩrĩ pereakõãrokoa. ⁷ Gũa, Marĩpũ ãgũ masĩrĩ merã irideare, neõgorague masaka ãgũsã masĩbirideare buea. I ũmũ iriburo dupuyuro, Marĩpũ: “Ãsũ irigũra”, ãrĩ gũñasiadi ããrĩmĩ. Irasirigũ marĩrẽ tauburire, marĩ ũmũgasigue ãgũ merã ããrĩnĩburire gũñasiadi ããrĩmĩ. ⁸ Ããrĩpererã i ũmũ marã masakare dorerã gapũ Marĩpũ õãrõ gũñadeare pẽmasĩbirinerã ããrĩmã. Irire õãrõ pẽmasĩrãno ããrĩã, marĩ Opũ Jesucristo õãtarigũre curusague pãbiatú wẽjẽbiribonerã ããrĩmã. ⁹ Ãsũ ãrĩ gojasũdero ããrĩbũ Marĩpũya werenĩrĩ gojadea pũgue:

Marĩpũ ãgũrẽ maĩrãya ããrĩburire õãrõ ãmuyusiadi ããrĩmĩ. I ãgũ õãrĩ ãmubosadea, ãgũsã neõ ããbiridea, pẽbiridea, neõ mẽrõgã gũñabiridea ããrã, ãrĩ gojasũdero ããrĩbũ.✧

¹⁰ Marĩpũ ãgũ irideare, marĩ masĩbirideare Õãgũ deyomarĩgũ merã marĩrẽ masĩmakũ yãmi. Õãgũ deyomarĩgũ Marĩpũ gũñarĩrẽ masĩgũ ããrĩpererire masĩpeokõãmi.

¹¹ Gajigũ masakũ gũñarĩrẽ marĩ neõ masĩbea. ãgũ basi ãgũ gũñarĩrẽ masĩmi. ãgũ irirosũta Õãgũ deyomarĩgũ sugũta Marĩpũ gũñarĩrẽ masĩmi. ¹² Marĩrẽ i ũmũma ãireta gũñabirikõãburo, ãrĩgũ, Marĩpũ marĩrẽ Õãgũ deyomarĩgũrẽ sĩdi ããrĩmĩ ãgũ irirosũ gũñaburo, ãrĩgũ. Marĩrẽ maĩgũ, Õãgũ deyomarĩgũ merã ããrĩpereri ãgũ sĩdeare masĩburo, ãrĩgũ, irasiridi ããrĩmĩ. ¹³ Irasirirã gũa mũsãrẽ Marĩpũyare buerã, Õãgũ deyomarĩgũ masĩrĩ sĩrĩ merã buea. Gũa basi

✧ 2:9 Is 64.4

masĩrĩ merã buebea. Irasirirã, Õãgũ deyomarĩgũ gũare buedorerosũta ãgũrẽ oparãrẽ buea.

¹⁴ Õãgũ deyomarĩgũrẽ opamerã, Marĩpũ Õãgũ deyomarĩgũ masĩrĩ sĩrĩrẽ gããmebema. Irire gããmemerã: “Ubu ããrĩrĩ ããrã”, ãrĩma. Õãgũ deyomarĩgũ iritamurĩ merãta marĩ ãgũyare pémasĩa. ãgũrẽ opamerã gapũ ãgũyare neõ pémasĩbema.

¹⁵ Marĩ Õãgũ deyomarĩgũrẽ oparã, ãgũ iritamurĩ merã ããrĩpereri ñerĩrẽ, õãrĩrẽ ãã beyemasĩa. Õãgũ deyomarĩgũrẽ opamerã gapũ, marĩ ãgũrẽ oparã iririre neõ ãã beyemasĩbirikuma. ¹⁶ Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Neõ sugũ marĩ Opũ gũñarĩrẽ masĩgũ mámi. Neõ sugũno ãgũrẽ buemasibirikumi”, ãrĩ gojasũdero ããrĩbũ. Marĩ gapũ Õãgũ deyomarĩgũrẽ oparã ããrĩsĩa, marĩ Opũ Cristo gũñarĩrẽ masĩa.

3

Marĩpũyarã ãgũrẽ moãboerã ããrĩma, ãrĩ gojadea

¹ Yaarã, yũ Õãgũ deyomarĩgũ doreri irirãrẽ buerosũ mũsãrẽ buebiribũ. I ãmũ marã Õãgũ deyomarĩgũrẽ opamerã irirosũ mũsã ããrĩmakũ ããgũ, irasiribũ. Cristoyare mũsã bũremuturabirimakũ ããgũ, majĩrãgãrẽ buerosũ mũsãrẽ buebũ.

² Irasirigu, majĩrãgã baari baamasĩmerã, ãpĩku dita mirĩrã irirosũ mũsã ããrĩmakũ ããgũ, diasabiri direta mũsãrẽ buebũ. Daporadere mũsã diasari buerire pémasĩbea dapa.

³ Mũsã, Õãgũ deyomarĩgũrẽ opamerã irirosũ gãme uburikũrã, gãme ããdũamerã, gãme dukawaridũarã

yáa. Irasirirã i ãmũ marã ãgũsã noó gããmerõ iridũarosu yáa. ⁴ Mũsã: “Yũ Pabloyagũ ããrã”, gajigũ: “Yũ Apoloyagũ ããrã”, ãrĩ werenía. Irasũ ãrĩrã, i ãmũ marã masaka Ôãgũ deyomarĩgũrẽ opamerã irirosũ werenía.

⁵ Gũa Apolos merã, ¿nasirirã ããrĩrĩ mũsã ããmakũ? Gũa Marĩpũre moãboerã ããrã. Gũa ãgũ iridorederosũta yáa. Irasirirã gũa Jesucristoya kerere weremakũ pérã, mũsã ãgũrẽ bũremunũgãbũ. ⁶ Yũ neõgoraguere mũsãrẽ buerũroribũ. Irasirigũ sugũ oteri yerire otegũ irirosũ iribũ. Irasiriadero pũrũ, Apolos mũsãrẽ buenemogũ, oterire koregũ irirosũ iridi ããrĩmĩ. Marĩpũ gapũ oteri purimakũ irirosũ mũsãrẽ Jesũre bũremunũgãmakũ iridi ããrĩmĩ. ⁷ Irasirirã oteri yerire oterimasã, korerimasãde ubu ããrĩrã ããrĩma. Marĩpũ gapũ iri oterire purimakũ irigũ ããrĩmi. ãgũ sugũta irire irimasĩmi. ⁸ Otepũroridi, pũrũ iri oteadeare koredi ãgũsã suro merã moãboerimasã ããrĩma. Marĩpũ ãgũsã moãderopã ãgũsãrẽ keoro wajarigũkumi. ⁹ Gũa Marĩpũyarã ãgũrẽ moãboerã ããrã. Mũsã gũayarã ããrĩbea. Marĩpũyarã ããrã. Irasirirã mũsã ãgũya pooere otedea irirosũ ããrã.

Irasũ ããrĩmakũ, mũsã ãgũ wãri wii irimũrĩri wii irirosũ ããrã. ¹⁰ Wii irimerẽgũ borari keoro nũpũrorigũ irirosũ, yũ, Marĩpũ iritamurõ merã mũsãrẽ Jesucristoyare keoro buerũroribũ. Pũrũ gajerã mũsãrẽ buenemorã, iri wiire peomũrĩãrã irirosũ irirãkuma. Iri wiire odorã irirosũ mũsãrẽ buenemorã, gopeyari merã keoro buero gããmea.

¹¹ Marĩpũ Jesucristore sugũreta pídi ããrĩmĩ masakare tauburo, ãrĩgũ. Irasirigũ yũ

musārē buegu, Jesucristo masakare tauri kerere bueruroribu. Neō suguno iri kerere gorawayumasībirikumi. ¹² Jesucristoyare oārō keoro buenemorā, oro, plata, gaji wajapari ūtāyeri merā wii irirā peomarīārā irirosū irirākuma. Gajerā gapu piriri yuku merā, tá merā, mijī pū merā tiamarīārā irirosū irirākuma. Īgūsā irirosū gajerā musārē buenemorā, ubu āārīrē, mata pererinerē buerākuma. ¹³⁻¹⁴ I ūmu peremakū, Jesucristo masakare ĩgūsā buedeare: “I musā buedeā oābu, i oābiribu”, ārī weregukumi. Oro, plata, wajapari ūtāyeri merā iridea gapu peamegue soemakū ūjūbirikoa. Yuku, tá, pūrī merā iridea gapu ūjūperekōārokoa. Irasirigu, gajinorē peamegue soegu, ¿díí ūjūrokuri, díí ūjūbirikuri? ārī beyerosū, Jesucristo ĩgūsā oārō, ñerō buedeare beyegukumi. Oārō keoro buedire keoro wajarigukumi. ¹⁵ Oārō keoro buebiridi gapure wajaribirikumi. Gajino ūjūrōsū ĩgū buedeā waja, wajataboadeā perekōārokoa. Īgū wajatabirikeregu, peamegue waabirikumi. Tausūgukumi. Wii ūjūmakū duriwiriagu irirosū mérōgā tarigukumi.

¹⁶ ¿Musā masīberi? Ōāgū deyomarīgū marīguere āārīmi. Irasirirā Marīpuya wii irirosū āārā. ¹⁷ Īgūya wii irirosū āārīrā, ĩgūyarā āārā. Irasirigu Marīpu ĩgūyarārē poyanorērānorē poyanorēgukumi.

¹⁸ Musā basi péwisibirikōāka! “Yu i ūmu marā buerire masītarinugāgū āārā”, ārībirikōāka! Irire masīmerā irirosū āārīka! Irasirimakū, Marīpu diayeta oārō masīrā dujamakū irigukumi. ¹⁹ I

ũmũ marã ãgũsã masĩrĩ, Marĩpũ ããmakũ ubu ããrĩrĩ ããrã. Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Marĩpũ gapũ masĩrĩmasã: ‘Ãsũ irirãra’, ãrĩ gũñaderosũ iridũarire iribirimakũ yãmi”, ãrĩ gojasũdero ããrĩbũ. ²⁰ Gajeroguedere ãsũ ãrĩ gojasũdero ããrĩbũ: “Marĩ Opũ, i ãmũ marã masĩrĩmasã gũñarĩrẽ masĩmi. Irire masĩgũ: ‘Ubu ããrĩrĩ ããrã iri’, ãrĩ ããrĩrĩ”, ãrĩ gojasũdero ããrĩbũ. ²¹ Irasirirã mũsarẽ buegũre: “Gajigũ nemorõ õãrõ buemi”, ãrĩbirikõãka! Marĩpũ ããrĩpereri mũsãya ããrĩburire sĩsiadi ããrĩmĩ. ²² Irasirigũ yũre, Apolore, Pedrore iriumi mũsã õãrõ ããrĩburire buedoregũ. Irasũ ããrĩmakũ, i ãmũma, mũsãya ããrĩburire sĩdi ããrĩmĩ. Dapora mũsã ããrĩburire, mũsã boadero pũrugue ããrĩburidere sĩdi ããrĩmĩ. I ããrĩpereri mũsãya ããrã. ²³ Irasũ ããrĩmakũ, mũsã Cristoyarã ããrã. Cristo Marĩpũyagũ ããrĩmĩ. Irasirirã mũsã Cristo merã Marĩpũyarã ããrã.

4

Pablo, Jesucristo ãgũyare buedoregũ pĩnerã moãrĩrẽ gojadea

¹ Mũsã gũare: “Cristore moãboerimasã ããrĩma”, ãrĩ gũñarõ gããmea. Gũare Marĩpũya kerere, masaka masĩbirideare buedoregũ pĩdi ããrĩmĩ. ² Moãrĩmasã ãgũsã opũ dorerire keoro irirã irirosũ gũa Cristore moãboerimasãdere ãgũ dorerire keoro iriro gããmea. ³ Mũsã yũre: “Marĩ Opũyare õãrõ buemi, o õãrõ buebirimi”, ãrĩmakũ, neõ bũjawerebirikoa. Gajerã masaka, yũ buerire: “Keoro ããrã, o keoro ããrĩbea”, ãrĩmakũdere neõ bũjawerebirikoa. Yũ baside yũ buerire: “I

gapure òãrõ buebu, i gapure òãrõ buebiribu”, ãrĩmasĩbirikoa. ⁴ Yu buedeare gũñagũ: “Ñerõ buekubu”, ãrĩ gũñabea. Irasirigu: “Yu ñerõ buede waja, waja opáa” ãrĩmasĩbea. Marĩ Opu suguta yu buerire: “Òãgoráa, o òãbea”, ãrĩ masĩmi. ⁵ Irasirirã marĩ Opu i ãmugue dupaturi aariburo dupuyuro gajerãrẽ: “Ìgũ dorederosũ keoro iribema”, ãrĩ werewuabirikõãka! Ìgũ dupaturi aarigú, ããrĩpererãrẽ Ìgũsã iridea gajerã masĩbirideare masĩmakũ irigukumi. Ìgũsã gũñarĩgue: “Ãsũ iridũakoa”, ãrĩ gũñadeadere masĩmakũ irigukumi. Irasirigu Marĩpu òãrõ irirãrẽ: “Òãrõ iribu”, ãrĩgukumi. Ìgũsã òãrõ irideropã Ìgũsãrẽ keoro irigukumi.

⁶ Yaarã, musãya ããrĩburire gwa Apolos merã iririkurire werebu, musãde gwa irirosũta iriburo, ãrĩgũ. Marĩpuya werenĩrĩ gojadea pũgue Ìgũ dorerire tarinugãbirikõãburo, ãrĩgũ, musãrẽ irire werebu. Irasirirã musã gware Ìãkũĩrã: “Gware buegu gapu, musãrẽ buegu nemorõ masĩtarinugãmi”, ãrĩbirikoa. ⁷ Musã gajerã nemorõ masĩtarinugãrã ããrĩbea. ããrĩpereri musã opari, Marĩpu musãrẽ sidea dita ããrã. Ìgũ sidea ããrĩkerepuwu, iro tamerãrẽ, çnasirirã musã basi: “Ìgũyare masĩpeokoa”, ãrĩrĩ? Ìgũ musãrẽ masĩrĩrẽ sibirimakũ, neõ masĩbiribokoa. Ìgũ musãrẽ masĩmakũ iridea direta masĩa.

⁸ Musã i gapure ãsũ ãrĩ gũñadãa: “Gwa ããrĩpereri opáa. Marĩpuyare masĩpeokõãa”, ãrĩ gũñadãa. Irasirirã gwa musãrẽ Ìgũyare buenemomakũ gããmebea. Musã oparã irirosũ: “ããrĩpereri

masĩtarinugārã ããrã”, ãrĩ gũñadãa. Musã diayeta oparã irirosũ ããrĩpereri masĩtarinugārã ããrĩmakũ õataribokoa. Irasirirã gũa musãrẽ buerãde musã merã oparã irirosũ ããrĩbokoa. ⁹ Yũ ãsũ ãrĩ pẽnãa: “Marĩpũ gũare Jesucristoyare buedoregũ pígu, ããrĩpererã nemorõ ubu ããrĩrã irirosũ ããrĩdoregũ pídi ããrĩmĩ”, ãrĩ pẽnãa. Irasirirã gũa wějẽbéosũmurã irirosũ ããrã. ããrĩpererã i ãmũ marã masaka, Marĩpũre wereboerã iũrõ gũa ñerõ taria. ¹⁰ Jesucristoya kerere gũa buemakũ, masaka gũare: “Pemasĩmerã ããrĩma”, ãrĩma. Musã gapũ musã basi: “Gũa Cristoyare pemasĩpeorã ããrã”, ãrĩkoa. Gũa, musã iãmakũta ubu ããrĩrã ããrã. Musã gapũ: “Gũa oparã irirosũ ããrã”, ãrĩkoa. Masaka gũa gapũre ubu iãbéokõãma. Musã gapũre goepeyari merã iãma. ¹¹ Gũa neõgoragueta ñerõ taripũrorimũrĩnerã, daporaguedere irasũta ããrĩkõãa. Uboãa, ñemesibua, surí opabea. Jesucristore bũremumerã gũare bũro ñerõ iribirama. Gũa buegorenasĩã, wiiri opabea. ¹² Irasũ ããrĩmakũ, gũaya ããrĩburire, gũa baaburidere, gũa basi moãpoyãa. Gajerã gũare ñerõ werenĩmakũ, gũa gapũ Marĩpũre ĩgũsãya ããrĩburire sërẽbosãa. Gajerã gũa noó waaró gũare ñerõ irimakũ, ubu pẽnãkõãa. ¹³ Gajerã gũare ñerõ ãrĩ werewũhamakũ, gũa gapũ ĩgũsãrẽ ãmuduarã, ĩgũsãrẽ õãrõ merã werea. I ãmũmarẽ ĩgũsã gããmebirire ĩgũsã béodea irirosũ gũare iãma. Neõgoragueta gũare doopũrorinerã, daporaguedere irasũta doonĩkõãma.

¹⁴ Irire gojagu, musãrẽ gũyasĩrĩdoregu meta yãa. Yũ musãrẽ maĩgũ, yũ pũrãrẽ irirosũ werea.

15 Wárã gajerã diez mil gora musãrẽ Cristoyare buebonerã ããrĩkererũ, ãgũ masakare tauri kerere bueroridi suguta ããrĩmi. Iri kerere musãrẽ bueroridi yuta ããrã. Yũ iri kerere buemakũ pérã, musã ãgũrẽ buremunugãbũ. Irasirigu yũ musãrũ irirosũ ããrã. 16 Irasirigu musãrẽ: “Yũ iririkũrere, majĩrã ãgũsã pagure ããkũĩrõsũ ããkũĩtayaka!” ãrĩ werea.

17 Musã irire irimakũ gããmegũ, Timoteore musã pũrogue iriua. ãgũ yũ buedi yũ magũ irirosũ, yũ maĩgũ ããrĩmi. Marĩ Opũ gããmerõsũ keoro irinĩkõãmi. Yũ Cristore buremugũ iririkũrere musãrẽ gũñamakũ irigukumi musãde irasũta iriburo, ãrĩgũ. Irasirigu, ããrĩpererã Cristore buremurãrẽ ããrĩpererogue ããrĩrãrẽ yũ buederosũta musãrẽ buegukumi. 18 Surãyeri musã watope ããrĩrã: “Pablo gũa pũro aaribirikumi”, ãrĩ gũñañurã. Irasirĩrã ãgũsã basi: “Gũa gajerã nemorõ masĩtarinugãrã ããrã”, ãrĩ, gũñanĩkõãñurã. 19 Yũ gapũ ãsũ ãrĩ gũñãa: “Marĩ Opũ gããmemakũ, mata musã pũrogue waagũra”, ãrĩ gũñãa. Irogue ejagu, masĩtarinugãrã ããrã, ãrĩ werenĩrãrẽ ããgura. Iri direta ããbirikoa. “¿Diyeta ãgũsã marĩ Opũ turari merã ãgũyare irirãta yãri?” ãrĩ ããgukoa. 20 Marĩrũ ãgũyarãrẽ doreri ãsũ ããrã. Marĩ ãgũyare werenĩkererã irire marĩ iribirimakũ, marĩ werenĩrĩ wajamãa. ãgũ turari merã ãgũyare irimakũ gããmemi. 21 ¿Ñeënorẽ gããmekuri musã? ¿Musã pũrogue musã ñerõ iriri waja musãrẽ turigu waamakũ gããmekuri, o musã õãrõ iriri waja gapure usũyari merã musãrẽ weregũ waamakũ gããmekuri?

5

Ñerō irigure béoka! ãrĩ gojadea

¹ Gajerã ãsũ ãrĩ kere werema yure. Sugũ mũsã merãmũ ãgũ búamorêta marãpokũayurũ. Irire pégu, pégũkakõãbũ. Gajerã Marĩpũre masĩmerã ããrĩkererã, irasũgora ñerō iribema. ² ãgũ ñerĩ irigu mũsã merã ããrĩkererũ, mũsã gapũ: “Gũa gajerã nemorō õãrã ããrã”, ãrĩ gũñadãa. Irasũ gũñarõno irirã, ãgũ ñerĩ iriri gapũre burõ bũjawereri merã gũñaka! Irasirirã, ãgũ ñerō iririre piribirimakũ ããrã, ãgũrẽ béokõãka! Mũsã merã nerẽdorebirikõãka! ³ Yũ gapũ mũsã pũrogue ããrĩbirikeregũ, yũ gũñarĩ merã mũsã merã ããrĩgũ irirosũ ããrã. Irasirigu yũ gũñarĩgue mũsãrẽ: “ãgũ ñerō irigure béokõãrõ gããmea”, ãrĩ gũñasiãa. ⁴ Irasirirã mũsã, marĩ Opũ Jesucristoyarã, ãgũ dorero merã nerêka! Yũde, yũ gũñarĩ merã mũsã merã nerẽgũ irirosũ ããrĩgũkoa. Marĩ Opũ Jesũde ãgũ turarĩ merã mũsã merã ããrĩgũkumi. ⁵ Mũsã irasũ nerẽrã, ãgũ ñerō irigure béokõãka, wãtẽa opũ Satanás ãgũ gããmerõ ãgũrẽ iriburo, ãrĩrã! Irasirigu ñerō tarigu, ãgũ ñerō iririre pirigũkumi. Marĩ Opũ Jesũs i ãmũgue dupaturi aarigũ, ãgũrẽ taugũkumi.

⁶ ãgũ ñerō irigure béomerã: “Gũa gajerã nemorō õãrã ããrã”, ãrĩ gũñabirikõãka! Mũsã ãgũ ñerō iririre ubu ããkõãrã, ããrĩpererã mũsãde ãgũ ñerō iririre pẽrẽbejarãkoa. ¿Mũsã ãsũ ãrĩ wererire masĩberi? “Pãrẽ irirã, mэрõgã pã wemasãrĩ poga merã trigo pogare morêkuma. Pũrũ iri wemasãseyakõãkoa”, ãrĩ werea. Iri poga wemasãseyarosũta ñerĩde mũsãguere õãrõ seyakõãrokoa. ⁷ Irasirirã ãgũ ñerĩ irigure béoka, gajerãde ñerō iriri, ãrĩrã!

Gɥayarã, judío masaka pascua bosenu irimurã pã wemasãmakũ iriri pogare béokuma. Irire béorosũta musã ñerĩ iririre béoka, ñerĩrẽ opamerã ããrĩmurã! Pascua bosenu ããrĩmakũ, judío masaka ovejare wějẽkuma ĩgũsã ñerĩ iridea wajare Marĩpũre béodorerã. Oveja boaderosũta Cristo marĩ ñerõ iridea waja boabosadi ããrĩmĩ Marĩpũ marĩrẽ: “Ñerĩ marĩrã ããrĩma”, ãrĩ ĩãburo, ãrĩgũ. ⁸ Irasirirã marĩ ñerĩ iririkũdeare pirikõãrõ gããmea. Ñerĩrẽ iriro marĩrõ ããrĩrõ gããmea. Irigatori marĩrõ, diayema õãrõ werenĩrĩ merã ããrĩrõ gããmea.

⁹ Yũ musãrẽ iripoegue gojadea pũgue ãsũ ãrĩ gojabũ: “Nomerẽ ñerõ gãmebirarikũrãrẽ wapikũbirikõãka!” ãrĩ gojabũ. ¹⁰ Yũ irasũ gojagu: “Ããrĩpererã ñerõ iririmasã i ãmũgue ããrĩrãrẽ neõ wapikũbirikõãka!” ãrĩgũ meta iribũ. I ãmũguere noó musã waaró Jesúre bũremumerã ããrĩma. Nomerẽ ñerõ gãmebirarikũrã, gajerãyare bũro gããmerã, yajarimasã, keori weadeare bũremurĩmasã wãrã ããrĩma. ĩgũsã ããrĩpererogue ããrĩmakũ, ĩgũsãno marĩrõgue waamasĩña máa. ¹¹ ãsũ gapũ ãrĩ gojabũ: “Surãyeri musã merã ããrĩrã: ‘Jesúre bũremua’, ãrĩkererã ñerĩ iririkũmakũ ĩãrã, ĩgũsãrẽ wapikũbirikõãka!” ãrĩ gojabũ. “Irasirirã nomerẽ ñerõ gãmebirarikũrãrẽ, gajerãyare bũro gããmerãrẽ, keori weadeare bũremurãrẽ, gajerãrẽ ñerõ kere wererãrẽ, mejãrikũrãrẽ, yajarikũrãrẽ wapikũbirikõãka! Irasiririkũrãno merã neõ baabirikõãka!” ãrĩ gojabũ. ¹²⁻¹³ Marĩpũ Jesúre bũremumerãrẽ ĩgũsã ñerõ iridea waja wajamoãgũkumi. Irasirigũ yũ musãrẽ: “Wajamoãka ĩgũsãrẽ!” ãrĩbea. Musã

tamerã mʉsã merã ããrĩrãrẽ ãgũsã ñerõ irimakũ ããrã, ãgũsãrẽ wajamoãka! Marĩpɣya werenĩrĩ gojadea pũgue gojaderosũta irika! ãsũ ãrĩ gojasũdero ããrĩbũ: “Sugɣ mʉsã merã ããrĩgũ ñerõ irimakũ ããrã, ãgũrẽ bẽokõãka!” ãrĩ gojasũdero ããrĩbũ. Irasirirã mʉsã merã ããrĩgũrẽ ãgũ búamorẽ ñerõ irigure bẽokõãka!

6

Jesúre bɣremurã gãme weresãrĩrẽ gojadea

¹ Mʉsã basi gãme guaseorã, ¿nasirirã weresãrĩrẽ beyerimasã Jesúre bɣremumerã pɣroque ãmudorerã waari? Jesúre bɣremurãrẽ mʉsã merãmarãrẽ weresãduarã, gajerã Jesúre bɣremurãrẽ irire ãmudorerã waarõ gããmea. ² ¿Ire mʉsã masĩberi? I ãmɣ peremakũ, marĩ Jesúre bɣremurã Marĩpɣyarã ããrĩsã, Jesús merã i ãmɣ marãrẽ dorerã ããrĩrãkoa. Irasirirã ãgũsãrẽ doremurã daporadere marĩ gãme guaseorire ãmudoremasã. ³ ¿Idere masĩberi mʉsã? Marĩ Jesús merã Marĩpɣre wereboerã ãmɣgasigue ããrĩrãrẽ dorerãkoa. Irasirirã ãgũsãrẽ doremurã ããrĩsã, i ãmɣmadere ãmudoremasã. ⁴ ¿Nasirirã i ãmɣmarẽ gãme guaseorã, Marĩpɣyare masĩmerã pɣroque irire ãmudorerã waari? ⁵ Mʉsãrẽ gɣyasĩrburo, ãrĩgũ, ire gojáa. ¿Mʉsã watopeguere neõ sugɣ masĩgũ, mʉsã guaseorire ãmugũno marĩgorakõãrĩ? ⁶ Mʉsã merãmɣ masĩgũno gapɣre ãmudorerono irirã, gajigɣ Jesúre bɣremugũrẽ weresãduarã, Jesúre bɣremumerã pɣroque ãmudorerã waãa.

⁷ Irasiriro, mʉsã gãme guaseorã, mʉsã basi ãmumasĩmerã, Jesúre bɣremumerã pɣroque irire

ãmudorerã waamakũ õãbea. Ìgũsãrẽ weresãrõno irirã, gajerã Jesúre bũremurã mũsãrẽ diaye iribiri-deare, mũsãrẽ yajadeare irasũ ìãkõãmakũ nemorõ õãboakuyo. ⁸ Mũsã Jesúre bũremurã ããrĩkererã, gajerã mũsãyarãrẽ diaye irimerã, mũsãde Ìgũsãyare yajarã yáa.

⁹ ¿Ire mũsã masĩberi? Ñerõ iririkurã Marĩpu Ìgũyarãrẽ doreroguere waabirikuma. Ire péwisibirikõãka! Ɛma nomerẽ ñerõ gãmebirarikurã, keori weadeare bũremurĩmasã, gajigũ marãpore ẽma marãpokurã, gajego marãpu merã ñerõ iririkurã, ũama seyaro Ìgũsã dupuri merã ñerõ iririkurã, nomede Ìgũsã seyaro ñerõ iririkurã Marĩpu puoguere neõ waabirikuma. ¹⁰ Irasũ ããrĩmakũ, yajarimasã, gajerãyare bũro gããmerĩmasã, mejãrikurã, gajerãrẽ ñerõ kere wererimasã, ãrĩgatori merã gajerãyare yajarimasã neõ Marĩpu puoguerẽ waabirikuma. ¹¹ Iripoeguere mũsã surãyeri irasirikurã ããrĩnerã ããrĩbũ. Irasirikurã ããrĩkerepuũ, Marĩpu mũsã ñerĩ oparire koedi ããrĩmĩ Ìgũyarã ããrĩmakũ irigu. Irasirigu mũsãrẽ: “Õãrã, waja opamerã ããrĩma”, ãrĩ ìãmi. Marĩ Opũ Jesucristo iridea merã, Õãgũ deyomarĩgũ mũsãguere ããrĩrĩ merã irasũ ãrĩ ìãmi.

Marĩya dupũ merã õãrõ iridorea, ãrĩ gojadea

¹² Masaka surãyeri ãsũ ãrĩ werenĩma: “Marĩ iridũarire noó gããmerõ irimasã”, ãrĩ werenĩma. Irasũta ããrã, ãrĩrõ tamerã. Yũ iridũari gajerãrẽ iritamubirimakũ ìãgũ, irire iribea. Irasirigu irire piridũagu, pirikõãrõ gããmea. ¹³ I masaka werenĩrĩ diayeta ããrã. ãsũ ãrĩ werenĩma: “Baari, marĩya paruma ããrĩburi ããrã. Marĩya paru, baari

baasãdiru ããrã”, ãrĩ wereníma. Marĩpũ gapũ i pe wãirẽ peremakũ irigũkumi. Irasiriro baari, marĩya paru irasũ ããrĩkõãrõ yáa. ãsũ gapũ ããrã. Marĩpũ, marĩya dupũ irigũ, ñerĩrẽ ãaribejaburi dupũre iribiridi ããrĩmĩ. Marĩ Opũ Jesucristo gããmerĩ gapũre iriburi dupũ ããrã. Īgũta marĩ merã ããrĩgũ marĩya dupũ Opũ ããrĩmi irire õãrõ iribu. ¹⁴ Marĩpũ Īgũ turari merã marĩ Opũ Jesucristo boadero pũrũ, Īgũya dupũre masũdi ããrĩmĩ. Īgũrẽ masũderosũta marĩ boadero pũrũ, marĩya dupũdere masũgũkumi.

¹⁵ ĶIre masã masĩberi? Marĩ Cristoyarã ããrĩmakũ, marĩya dupũ, Īgũya dupũma ããrĩrĩ irirosũ ããrã. Marĩ irasũ ããrĩrã, nomeõ ũma merã ñerõ iririkũrimasõ merã ñerõ irimakũ õãbirigorakõãa. Irasirirã irinorẽ neõ iribirikõãdorea. ¹⁶ ĶIdere masã masĩberi? Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Ūmũ, nomeõ merã marãpokũgũ, pẽrã ããrĩkererã, Marĩpũ ĩãmakũ su dupũ irirosũta ããrĩrãkuma”, ãrĩ gojasũdero ããrĩbũ. Irasirigũ sugũ ñegõ merã marãpokũmakũ, Īgũya dupũ igoya dupũ merã ããrĩrõ, su dupũ irirosũta ããrã. ¹⁷ Irasũta sugũ marĩ Opũ Jesucristore bũremugũ Īgũ merã pẽrã ããrĩkererã, su dupũ irirosũta ããrĩma. Irasirirã su gũñarĩta opama.

¹⁸ Irasirirã ũma nomerẽ gãmebirarire neõ iribirikõãka! Gaji marĩ ñerõ iririre irirã, marĩya dupũguere ñerõ iribea. Ūma Īgũsã marãposã nome ããrĩmerã nomerẽ gãmebirarã gapũ Īgũsã basi Īgũsãya dupũre ñetariro irirã yáma. Cristoya dupũguere ñerõ irirã irirosũ yáma. ¹⁹ ĶMasã ire masĩberi? Marĩpũ marĩrẽ Ōãgũ deyomarĩgũrẽ

sīdi āārīmí. Irasirigũ Õãgũ deyomarĩgũ marĩguere āārĩmakũ, marĩya dupũ ĩgũya wii irirosũ āārã. Irasiriro marĩya dupũ marĩya dupũgora āārĩbea. ²⁰ Marĩpũ marĩrẽ burõ maĩgũ, Jesucristore iriudi āārīmí marĩ ñerĩ iridea wajare wajaridoregũ. ĩgũyarã āārĩburo, ārĩgũ, irasiridi āārīmí. Irasirirã marĩ ĩgũ wajarinerã āārĩsĩã, marĩya dupũ merã Marĩpũ gããmerõsũta iriro gããmea gajerãde ĩgũrẽ burõmuburo, ārĩrã.

7

Mojõsiarimarẽ gojadea

¹ Daporare musã yũre sērẽña gojadeare yujugura. Marãpokũbirimakũ, marãpokũbirimakũ, õãgorãa. ² Irasũ āārĩkerekerepũ, āārĩpereroguere ãma nomerẽ gãmebirari āārã. Irasirirã ãma ĩgũsãkũ marãpokũro gããmea, gajerã nome merã ñerõ iriri, ārĩrã. Nomede ĩgũsãkũ marãpokũro gããmea, gajerã ãma merã ñerõ iriri, ārĩrã. ³ Marãpokũgũ ĩgũ marãpo merã õãrõ āārĩrikũro gããmea. Igode marãpũ merã õãrõ āārĩrikũro gããmea. ⁴ Marãpokũgore igoya dupũ igoya dita āārĩbea. Igo marãpũ gããmerõsũta ĩgũ merã āārĩrõ gããmea. Igo marãpũdere ĩgũya dupũ ĩgũya dita āārĩbea. ĩgũ marãpo gããmerõsũta igo merã āārĩrõ gããmea. ⁵ Āsũ iriburo. Igo marãpũ igo merã āārĩduamakũ yujuburo. ĩgũde igore yujuburo. ĩgũsã Marĩpũre sērẽmurã: “Irikũnarĩ marĩ iririkũrinorẽ iribirikõãrã”, ārĩ ãmuadero pũrũ merẽ irasũ iribirikõãburo. Marĩpũre sērẽ odoadero pũrũ, dupaturi ĩgũsã āārĩrikũderõsũta

ãārĩburo doja. Īgūsã irasiribirimakũ, wãtĩ ĩgūsãrẽ gajerã merã ñerõ irimakũ iribokumi.

⁶ Y_u musãrẽ ire dorerigora irirosũ werenígũ meta yáa. Musã irasũ irimakũ õãrokoa, ãrĩgũ, irasũ ãrã. ⁷ Y_u ãsũ ãrĩ gũñáa. ããrĩpererã musã y_u irirosũta marãpo marĩrã ããrĩmakũ gããmeadikoa. Marĩp_u gap_u marĩ ããrĩpererãrẽ sũrosũ píbiridi ããrĩmĩ. Surãyerire marãpo marĩmurãrẽ, o marãp_u marĩmurãrẽ pídi ããrĩmĩ. Gajerã gap_ure marãpokumurãrẽ, o marãpokumurãrẽ pídi ããrĩmĩ.

⁸ Irasirig_u musã marãpo marĩrãrẽ, marãp_u marĩrãrẽ, wapiweyarã nomerẽ ãsũ ãrã. Y_u irirosũ musã marãpokubirimakũ, o marãpokubirimakũ õãgoráa. ⁹ Ūma, nome merã ããrĩdũarire nuããmerãno marãpokuburo. Nomedede irasũta iriburo. Īgūsã marãpokumakũ, marãpokumakũ õãgoráa. Irasirirã ĩgūsã nome merã, ũma merã ããrĩdũari direta gũñanĩbirikuma.

¹⁰ Marãpokurãrẽ, marãpokurãrẽ y_u ãsũ dorea. I y_u doreri ããrĩbea. Marĩ Op_u ire doredi ããrĩmĩ. ãsũ ãrĩ doredi ããrĩmĩ: “Nomeõ igo marãp_ure béobirikõãburo”. ¹¹ Nomeõ igo marãp_ure béogo, gajig_ure marãpokubirikõãrõ gããmea. Igo marãp_u ããrĩdi merã ãmubeo, sugota ããrĩkõãrõ gããmea. Ūmũude ĩgũ marãpore béobirikõãrõ gããmea. Īgũde ĩgũ marãpo ããrĩdeo merã ãmubi, marãpo marĩgũta ããrĩkõãrõ gããmea.

¹² Gajerãrẽ y_u gũñarĩrẽ weregura marĩ Op_u weredoredea ããrĩbirikerepuru. ãsũ ãrã. Sug_u Jesúre bũremugũ, Jesúre bũremubeore marãpokũadero puru, igo ĩgũ merãta dujadũamakũ, igore béobirikõãrõ gããmea. ¹³ Nomeõde Jesúre bũremugõ

Jesúre b̄remubire mar̄ap̄uk̄ugo, igo mer̄ã ãgũ dujad̄amakũ, ãgũr̄ẽ b̄éobirik̄õãr̄õ gããmea. ¹⁴ Sugũ Jesúre b̄remubi mar̄ãpo Jesúre b̄remugõ ããr̄ĩmakũ ããgũ, Mar̄ĩp̄ũ ãgũr̄ẽ: “Yaagũ irirosũ ããr̄ĩmi”, ãr̄ĩ ããmi. Irasũta sugo Jesúre b̄remubeo mar̄ãp̄ũ Jesúre b̄remugũ ããr̄ĩmakũ ããgũ, Mar̄ĩp̄ũ igore: “Yaago irirosũ ããr̄ĩmo”, ãr̄ĩ ããmi. ãgũ irasũ ããbirimakũ, ãgũsã pũrã Jesúre b̄remumerã pũrã irirosũ ããr̄ĩbokuma. Irasirigũ ãgũsã pũrãdere Jesúre b̄remurã pũrã irirosũ ããmi. ¹⁵ Jesúre b̄remubi gapũ ãgũ mar̄ãpo Jesúre b̄remugõr̄ẽ b̄éod̄uagũ, b̄éoburo. Irasũta Jesúre b̄remubeo igo mar̄ãp̄ũ Jesúre b̄remugũr̄ẽ b̄éod̄uago, b̄éoburo. Mar̄ĩp̄ũ mar̄ĩr̄ẽ gajerã mer̄ã gãmek̄ẽãr̄õ mar̄ĩr̄õ usuyari mer̄ã ããr̄ĩmakũ gããmemi. Irasirirã ãgũsã b̄éod̄uamakũ õãgorãa. ¹⁶ Jesúre b̄remugõ, igo mar̄ãp̄ũ Jesúre b̄remubire: “Yũ mer̄ã ããr̄ĩgũ, b̄remugũkumi”, ãr̄ĩmasĩña mãa. Irasũta Jesúre b̄remugũ, ãgũ mar̄ãpo Jesúre b̄remubeore: “Yũ mer̄ã ããr̄ĩgõ, b̄remugokumo”, ãr̄ĩmasĩña mãa.

¹⁷ ãsũ iriro gããmea mar̄ĩr̄ẽ ããr̄ĩpererã mar̄ĩ Op̄ũ Jesucristoyar̄ãr̄ẽ. Mar̄ĩp̄ũ mar̄ĩr̄ẽ Jesúre b̄remun̄gãdoregũ siiudeapoe ãgũ mar̄ĩr̄ẽ: “ãsũ irika!” ãr̄ĩ píderosũta iriwãgãr̄õ gããmea. Yũ irire ããr̄ĩperero mar̄ãr̄ẽ Jesúre b̄remurãr̄ẽ dorea.

¹⁸ Mar̄ĩp̄ũ sugũre ãgũya dupũma gasirogãr̄ẽ*

* **7:18** Gn 17.1-14: Iripoegue Mar̄ĩp̄ũ Abrahãr̄ẽ ãgũ pũrã ãmar̄ẽ: “Yaarã ããr̄ĩburo”, ãr̄ĩgũ, ãgũsãya dupũma gasirogãr̄ẽ wiiridoredi ããr̄ĩmi. Pũrũ iri dorerire Moisére pídi ããr̄ĩmi. Irasirirã judío masaka Abraham parãmerã ããr̄ĩturiarã iri dorerire irirã, ãgũsã pũrã ãmar̄ẽ su mojõma pere gaji mojõ ngeru p̄r̄ẽbejarinãr̄ĩ waaró mer̄ã ãgũsã deyoadero pũrũ irasũ yãma.

wiirisũdire siiumakũ, irasũta dujaro gããmea. Irasũta wiirisũbire siiumakũ, wiirisũbita dujaro gããmea. ¹⁹ Daporare wiirisũnerã ããrĩrĩ, wiirisũbirinerã ããrĩrĩde wajamáa. Marĩpũ dorerire marĩ iriri gapũ wajakutarinũgãa. ²⁰ Irasirirã Marĩpũ marĩrẽ masakakũre siuideapoe ĩgũ marĩrẽ píderosũta iriwãgãrõ gããmea.

²¹ Marĩpũ mũsãrẽ siuideapoe surãyeri gajerãrẽ moãboerimasã ããrĩbũ. Irasũ ããrĩkererã, mũsã moãboerimasã ããrĩrĩrẽ gũñarikũbirikõõaka! Gajipoe mũsã oparã mũsãrẽ wiudũamakũ, wirika! ²² Marĩpũ mũsãrẽ marĩ Opũ Jesucristore bũremudoregũ siudi ããrĩmĩ. Irasirirã surãyeri mũsã gajerãrẽ moãboerimasã ããrĩkererã, daporare Jesucristoyarã ĩgũ wiunerã irirosũ ããrã ĩgũyare irimurã. Mũsã gajerãrẽ moãboerimasã ããrĩbirikererã, daporare Jesucristore moãboerã ããrã. ²³ Marĩpũ marĩrẽ ĩgũyarã ããrĩburo, ãrĩgũ, ĩgũ magũ Jesucristo boagũ dí béodea merã wajaridi ããrĩmĩ. Irasirirã masakare moãboerã irirosũ ããrĩbirikõõaka! Masaka gããmerĩnorẽ iribirikõõaka! Marĩpũ gããmerĩ gapũre irika! ²⁴ Irasirirã, Marĩpũ mũsãrẽ Jesucristore bũremunũgãdoregũ siuideapoe mũsãrẽ píderosũta ĩgũ merã õãrõ ããrĩnĩkõõaka!

²⁵ Daporare mũsã marãpo marĩrãrẽ, marãpũ marĩrãdere weredũakoa. I yũ wereburi marĩ Opũ weredoredea ããrĩbea. Irasũ ããrĩbirikerepũyũ, yũ basi gũñarĩ merã mũsãrẽ weregũra. Marĩ Opũ yũre bopoñarĩ merã ĩãsiã, yũre iritamumi. Irasirirã mũsã yũ wererire: “Irimakũ õãgoráa”, ãrĩ masĩrãkoa. ²⁶ Daporare marĩrẽ wári ñerõ tariri ããrã. Irasirirã mũsã ããrĩrikũrosũta dujamakũ

õãgoráa. ²⁷ Marãpokurã, marãpukurã gãme béobirikõãka! Marãpo marĩrã, marãposã nome ãmabirikõãka! ²⁸ Y_u musãrẽ irire werekerer_u, musã marãpokurã, Marĩ_u dorerire tarinugãrã meta yáa. Nomeõde marãpukugo, Marĩ_u dorerire tarinugãgõ meta yámo. Irasũ ããrĩkerer_u, marãpokurã, marãpukurã gap_u ãgũsã okarinũrĩrẽ poyari merã ããrĩrãkuma. Irasirig_u y_u irire: “Poyari merã ããrĩbokuma”, ãrĩgũ: “Marãpo marĩrã, marã_u marĩrã ããrĩkõãka!” ãrã musãrẽ.

²⁹ Yaarã, y_u musãrẽ irasũ ãrĩgũ, ãsũ ãrĩduagu yáa. Marĩ i ãmugue ããrĩrikari pereburo mérõ duyáa. Irasirirã daporare marãpo marĩrã Marĩ_uyare õãrõ moãrõsũta marãpokurãdere õãrõ moãrõ gããmea. Marãpukurã nomede irasũta Marĩ_uyare õãrõ iriro gããmea. ³⁰ Marĩ orekererã, bujaweremerã irirosũ ããrĩrõ gããmea. Usuyakererã, usuyari merã bosenu irimerã irirosũ ããrĩrõ gããmea. Gajino wajarikererã: “I yaa ããrĩnikõãrokoa”, ãrĩ gũñabirikõãrõ gããmea. Irasirirã, marĩrẽ Marĩ_uyare õãrõ iriro gããmea. ³¹ I ãmumarẽ iriduarire buro gũñarikubirikõãrõ gããmea.

³² Y_u musãrẽ gũñarikuro marĩrõ ããrĩmakũ gããmea. Marãpo marĩgũ, marĩ Op_uyare õãrõ gũñami. Irasirig_u ãgũrẽ usuyamakũ gããmegũ, ãgũyare õãrõ yámi. ³³ Marãpokug_u gap_u ãgũ marãpo õãrõ usuyari merã ããrĩmakũ gããmegũ, i ãmumarẽ gũñami. ³⁴ Irasirig_u marĩ Op_u gããmerĩrẽ, ãgũ marãpo usuyamakũ gããmerĩ gap_udere gũñami. Nomedere irasũta ããrã. Marã_u marĩgõ marĩ Op_uyare õãrõ gũñamo. Igo gũñarĩ

merã Marĩpuyago õãrõ ããrĩduago, ĩgũ gããmerõsũta iridũamo. Marãpũkũgo gapũ igo marãpũ õãrõ usuyari merã ããrĩmakũ gããmegõ, i ùmumarẽ gũñamo.

³⁵ Yũ mũsãrẽ õãrõ waaburo, ãrĩgũ, marĩ Opũ gããmerĩ direta keoro iridoregũ ire gojãa. Mũsãrẽ marãpokũrire, marãpũkũrire kãmutagũ meta yãa.

³⁶ Sugũ ĩgũ magõ búro waamakũ ĩãgũ, ãsũ ãrĩbokumi: “Yũ magõrẽ õãrõ iribirikoa. Igo marãpũkũmakũ õãbokoa”, ãrĩbokumi. Irasũ ãrĩgũ nomesukõãburo. Irasiriri, ñerõ iriri ããrĩbea. ³⁷ Gajigũ gapũ: “Nomesuro gããmekoa”, ãrĩbiribokumi. ãsũ gapũ ãrĩbokumi: “Yũ magõ marãpũkũbirikõãburo”, ãrĩbokumi. ĩgũ irasũ ãrĩmakũ, igore õãrõ waabokoa. ĩgũ irasũ iridũari õãgorabokoa. ³⁸ Magõrẽ marãpũkũdoregũ, õãrõ irigũ yãmi. Irota marãpũkũdorebi gapũ nemorõ õãrõ iritarinũgãgũ yãmi. Daporare marĩrẽ wãri ñerõ tariri ããrã. Irasiriro marãpũkũbirimakũ, marãpokũbirimakũ nemorõ õãa.

³⁹ Marĩpũ marĩrẽ doreri ãsũ ãrã. Marãpũkũgo igo marãpũ okamakũ, ĩgũ merã ããrĩnĩkõãburo. ĩgũ boadero pũrũgue, gajigũ igo suyugũre marãpũkũmasĩgokumo ĩgũ Jesúre bũremugũ ããrĩmakũ. ⁴⁰ Yũ gapũ ãsũ ãrĩ gũñãa. Igo dupaturi marãpũkũbeo, nemorõ usuyabokumo. Yũde, gajerã mũsãrẽ buerimasã irirosũ Õãgũ deyomarĩgũrẽ opãa. Irasirigũ irire werea mũsãrẽ.

8

*¿Keori weadea pũro baari pídeare baamakũ õãkuri?
ãrĩ gojãdea*

1 Dapora mʘsā: “¿Keori weadea pʘro baari pʘdeare baamakū ōākuri?” ārī sērēñadeare yʘjʘgʘra. Mʘsā irire masīa. Īgʘsā bʘremurī weadea neō wajamāa. Irasirirā: “Gʘa tamerā ōārō masīa”, ārī gūñarā, gajerārē masītarinʘgādʘarā irirosū yāa. Gajerārē maīrā, āsū gapʘ iriro gāāmea. Nemorō Īgʘsārē Marīpʘyare bʘremunemomakū iriro gāāmea. 2 Sugʘ: “Masīpeokōāa”, ārīgʘno, ōārō masībemi. Wári dʘyāa Īgʘ masībiri. 3 Marīpʘ Īgʘrē maīgʘ gapʘre masīmi. “Yaagʘ āārīmi, Īgʘrē masīa”, ārīmi.

4 Irasirigʘ yʘ mʘsārē keori weadea pʘro baari pʘdea baarire weregʘra. Diayeta āārā. Īgʘsā bʘremurī weadea neō wajamāa. Gajigʘ, Marīpʘ irirosū āārīgʘ neō mami. Īgʘ sugʘta āārīmi. 5 Gajerā masaka Īgʘrē bʘremunerā wārā gajerānorē bʘremuma. Őmarōgue āārīrārē, i ũmʘgue āārīrārē bʘremuma. “Marī bʘremurā, marī oparā āārīma”, ārī bʘremuma. 6 Marīpʘ sugʘta āārīpererire iridi āārīmí. Irasirirā marī Īgʘyarā āārīsīā, Īgʘ dorerire irimurā āārā. Irasū āārīmakū, Jesucristo sugʘta marī Opʘ āārīmi. Īgʘ merā Marīpʘ āārīpererire iridi āārīmí. Īgʘ merā marīdere Īgʘyarā āārīmakū iridi āārīmí. Irasirirā Īgʘ merā āārīnīkōārākoa.

7 Yʘ wereri diaye āārīkerepʘra, surāyeri Jesúre bʘremurā irire masībema. Iripoegue keori weadeare bʘremunerā āārīsīā, daporadere iri keori weadea pʘro baari pʘdeare baarā: “Marī bʘremunerā keori weadeare bʘremurā yāa”, ārī gūñadima. Irasirirā ōārō masīmerā irire baarā: “Ñerō irirā yāa”, ārī gūñadima. Irasū

gũñakererã, irire baakõãma. ⁸ Marĩ irire baarã, Marĩpɛ merã nemorõ õãrõ ããrĩmasĩbirikoa. Gajerã nemorõ õãrã waabirikoa. Irire baamerãde, gajerã nemorõ ñerã waabirikoa. ⁹ Irasũ ããrĩkerekɛpɛɛɛ, õãrõ pɛmasĩka! Mɛsã noó gããmerõ baarã, gajigɛ Jesúre bɛremuturabire ñerõ irimakũ iribirikõãka!
¹⁰ Æsũ ããrã. “Ígũsã bɛremurĩ keori weadea neõ wajamáa”, ãrĩ masĩa. Irasirirã iri keori weadeare bɛremurĩmasã baarogue baarã: “Õãbea”, ãrĩ gũñabea. Jesúre bɛremuturabi gapɛ, mɛsã irogue baamakũ ãgũ: “Irogue baarã, Marĩpɛre bɛremubema”, ãrĩ gũñabokumi. Irasũ ãrĩ gũñakeregɛ, mɛsãrẽ ãkũĩ, Ígũde baakõãbokumi. Irasũ baagɛ: “Ñerõ irigɛ yáa”, ãrĩ gũñabokumi. Ígũ irasũ gũñamakũ, mɛsã Ígũrẽ ñerõ irimakũ irirãkoa. ¹¹ Mɛsã õãrõ masĩrã irogue baarã, gajigɛ õãrõ masĩbi gapɛre ñerõ irimakũ iribokoa. Cristo Ígũdere boabosadi ããrĩmĩ. Irasirirã mɛsã baari merã Cristoyagɛre poyanorẽbokoa. ¹² Irasũ ããrĩmakũ, gajigɛ õãrõ masĩbire: “Irire baamakũ ñegorãa”, ãrĩ gũñakeregɛ irire baamakũ irirã, Cristodere ñerõ irirã yáa. ¹³ Irasirigɛ yɛ baari merã gajigɛ Cristoyagɛre ñerõ irimakũ iribokoa, ãrĩgũ, iri baarire neõ dupaturi baabirikoa.

9

Jesús buedoregɛ pídi Ígũ wajatarimarẽ gojadea

¹ Jesucristo yɛre Ígũyare buedoregɛ pídi ããrĩmĩ. Irasirigɛ yɛde gajerã Ígũ buedoregɛ pínerrã irirosũta irimasĩa. Yɛde marĩ Opɛ Jesúre ããdita ããrã. Irasũ ããrĩmakũ, yɛ mɛsãrẽ Ígũya kerere buemakũ pérã, Ígũrẽ bɛremunugãbɛ. ² Gajerã

yure: “Ígũ Jesús buedoregũ pídi meta ããrĩmi”, ãrĩ werewhakerepũũ, mũsã gapũ irasũ ãrĩbea. Yũ buemakũ pérã, mũsã Jesúre bũremubũ. Irasirirã ígũrẽ bũremurã ããrĩsĩã, yure: “Ígũ Jesús buedoregũ pídi ããrĩmi”, ãrĩ masĩa.

³ Yũre werewharãrẽ ãsũ ãrĩ yũjũgũra. ⁴ Yũ mũsãrẽ bueri waja, mũsã yũre baari ejo, iirĩri tĩãmakũ ñeãmasĩa. ⁵ Gajerã Jesús buedoregũ pínerã, ígũ pagũpũrã, Pedrosã buegorenarã, ígũsã marãposã nomerẽ ãĩãnama. Ígũsã irirosũta yũde Jesucristore bũremugõrẽ marãpokũgũ ãĩãnabokoa. ⁶ ¿Naásũ gũñarĩ mũsã? Gajerã Jesús buedoregũ pínerã mũsãrẽ buerã, ígũsã baaburire moã wajatabema. ¿Nasirirã yũ, Bernabé mũsãrẽ buerã, gũa baaburire wajatadũarã, moãduúmasĩbirikuri? ⁷ Surara ígũ baaburi waja ígũ basi wajaribirikumi. Ígũ surara moãrĩ waja ígũ oparã gapũ irire wajaribosakuma. Iguidari otedi, ígũ otedea dukare tea, baamasĩkumi. Ovejare koregũde, ígũsãya ũpĩkure bipi, iirĩmasĩkumi. ⁸ Yũ mũsãrẽ irasũ ãrĩgũ, masaka gũñarĩ merã werebea. Yũ ãrĩrõsũta Marĩpũ doreri gojadea pũgue ãsũ ãrĩ gojasũdero ããrĩbũ: ⁹ “Wekũ trigo yeri gasirire ígũya guburi merã kũra koro, trigore baadũagũ baaburo. Ígũya disi túsãrĩ berore túsãbirikõãka!” ãrĩ gojasũdero ããrĩbũ. Marĩpũ irire doregũ, wekũayama direta ãrĩgũ meta iridi ããrĩmĩ. ¹⁰ Irire doregũ, gũa ígũya kerere buerãya ããrĩburire ãrĩgũ iridi ããrĩmĩ. Æsũ ããrã. Sugũ oteburore ãmukumi. Pũrũ gajigu iro otedea dukare seakumi. Irasirirã iri otedea dukare dukawaburire gũñarã, pẽrãgueta õãrõ moãkuma. ¹¹ Gũa mũsãrẽ Marĩpũya werenĩrĩrẽ

buerã, oterimasũ ãgũ oteri yerire otegũ irirosũ iribũ. Oterimasũ ãgũ moãrĩ waja, ãgũ otedea dakare seamsĩkumi ãgũya ããrĩburire. Irasiro, gũa musãrẽ bueri waja, musã guaya ããrĩburire gajino guare sĩmakũ õãbokoã. ¹² Musã guare sĩbirikererã, gajerã buerã musãrẽ sērẽmakũ, ãgũsã gapure sũyuro. Gũa gapũ ãgũsã nemorõ sērẽmasĩa musãrẽ bueri waja.

Gũa musãrẽ: “Sĩka!” ãrĩbonerã ããrĩkererã, neõ irasũ ãrĩbea. “ãgũsã Cristoya kerere pẽduabiribokuma gũa ãgũsãrẽ gajinorẽ sērẽmakũ”, ãrĩ gũñabũ. Irasirirã gũa gããmerĩrẽ opabirikerepũ, musãrẽ neõ sērẽbiribũ. ¹³ Musã ire masĩa. Marĩpũya wiigue moãrĩmasã, Marĩpũre bũremurã waibũ diĩ ãri sĩdeare baama ãgũsã irogue moãrĩ waja. Iri wiima waimũrãrẽ wẽjẽ soepeoro pũro moãrãde irireta baama. ¹⁴ I irirosũta marĩ Opũ ãgũya kerere wererãya ããrĩburire ãsũ ãrĩdi ããrĩmĩ: “ãgũsã moãrĩ merã ãgũsã baaburire wajata baaburo”, ãrĩdi ããrĩmĩ. ¹⁵ Irasũ ããrĩkerepũ, yũ gapũ musãrẽ: “Sĩka!” neõ ãrĩbiribũ. Daporadere gojagũ, musãrẽ gajino sērẽgũ meta gojãa. Ũaboari merã boakeregũ, musãrẽ buedea waja neõ wajaseabirikoa. Irasirigũ wajamarĩrõ musãrẽ usũyari merã buea. Yũ musãrẽ buedea waja merã neõ wajata baabirikoa.

¹⁶ Marĩpũ yũre ãgũ masakare tauri kerere were-doregũ pídi ããrĩmĩ. Irasirigũ yũ iri kerere weregũ: “Gajerã nemorõ masĩtarĩngãgũ ããrã”, neõ ãrĩ gũñabea. Iri kerere werebi, bũro bũjawereri merã ñerõ taribokoã. ¹⁷ Iri kerere yũ basi yũ gũñarĩ merã buegũ, wajatabokoã. Marĩpũ yũre dorederosũta iri kerere buegũ, ãgũ yũre pídea gapure irigũ yãa.

Īgũ yũre píderosũta iriro gããmea. Gaji gapũre neõ irimasĩna máa. ¹⁸ Irasirigũ Jesucristoya kerere buegũ, yũ bueri waja mũsārē: “Wajarika!” ārĩ sērēbuno āārĩkeregũ, irire neõ sērēbiribũ. Yũ irasirimakũ, yũ wajatari āsũ āārā: “Jesucristo Īgũrē bũremurārē taugũkumi”, ārĩrĩ kerere wajamarĩrõ buegũ, õārõ mũsũyari merā āārā. Irita āārā yũ wajatari.

¹⁹ Masakare moãboegũ neõ āārĩbirikeregũ, āārĩpererārē moãboegũ irirosũ irigũ yáa, Īgũsã Jesucristoya kerere péburo, ārĩgũ. Wárā Īgũrē bũremumakũ gããmegũ, irasũ yáa. ²⁰ Irasirigũ yaarā judío masaka merā āārĩgũ, Īgũsã õārĩ iririkũrosũta yáa, Īgũsã Jesúre bũremumakũ gããmegũ. Āsũ āārā. Īgũsã Moisés dorerire bũremuma. Yũ Moisés doreri direta bũremugũ āārĩbirikeregũ, Īgũsã merā āārĩgũ, Īgũsã iririkũrosũta yáa, yũ buerire pémakũ gããmegũ.

²¹ Moisés dorerire bũrenumerā merā āārĩgũ, Īgũsã õārĩ iririkũrosũta yáa, Īgũsãde Jesúre bũremumakũ gããmegũ. Irasirikeregũ, Cristore bũremusĩā, Marĩpũ dorerire tarinũgãbea.

²² Jesúre bũremuturamerā merā āārĩgũ, Īgũsã õārĩ iririkũrosũta yáa, Īgũsãde Jesúre bũremunemburo, ārĩgũ. “Mũsã nemorõ Jesúre bũremugũ, Īgũyare masĩpeogũ āārā”, neõ ārĩbea Īgũsārē. Irasirigũ āārĩpererā õārĩ iririkũrosũta yáa: “Surāyeri yũ buerire pérā, tausũrākuma”, ārĩgũ. ²³ Ī āārĩpererire irasũ yáa: “Jesucristo Īgũrē bũremurārē taugũkumi”, ārĩrĩ kerere Īgũsã õārõ péburo, ārĩgũ. Īgũsã iri õārĩ kerere bũremumakũ ĩãgũ, yũ Īgũsã merā bũro mũsũyáa.

24 Musārē i keori merā āsū ārī werea. Ūma birarimasā, āārīpererā ūmakererā, wajataperebirikuma. Ūmaturagū dita wajakumi. Irasirirā, wajatadugū buro ūmaderosūta musāde Marīpū gāāmerīrē ōārō irika, ĩgū sīburire wajatamurā! 25 Āārīpererā ūma biramurā ĩgūsā ūmaburi dupuyuro ōārō ūma buekuma. Āārīpereri ĩgūsāya dupure poyanorērīrē pirikōākuma. Olivo wāikūdima pūrī merā iridea berore wajataduarā, irasū ūma buekuma. Pūgū gajerārē ĩmurā, wajatadiya dipurugue iri berore peokuma. Iri bero mata boakōākoa. Marīde Marīpūyare ōārō buero gāāmea. Ŋērīrē pirikōā, ĩgū gāāmerī gapure iriro gāāmea, ĩgū sīburire wajatamurā. ĩgū sīrī neō boabirikoa. 26 Irasirigū yū gapū, ūma birarimasū ĩgū noō gāāmerō ūmagū irirosū iribea. Yū gāāmerō irimoāmabea. Marīpūyare masīsīā, ĩgū gāāmerīrē irigū yāa. 27 Irasirigū yū iriduarire, yū uaribejarire iribea. Yū iriduarire irimakū, gajerārē Marīpūyare buedi āārīkererūgū, Marīpū yūre: “Ōārō iribū”, ārībiribokumi.

10

Keori weadeare bremubirikōāka! ārī gojadea

1 Yaarā, musārē irire masīmakū gāāmea. Marīpū, gūa űnekūsāmarā merā āārīdi āārīmī ĩgūsārē Egiptogue āārīrārē āī wiugū. ĩgū iriudea mikāyebo merā ĩgūsārē dupuyudi āārīmī. Āārīpererā ĩgūrē tūyarā, dia wādiya, deko diiadiya wāikūdiya dekogue, bojori maā ĩgū iridea maague taribujanerā āārīmā. 2 ĩgūsā Moisés merā mikāyebo doka, dia wādiyare taribujanerā

ãārĩmá. Iro taribujarã, ããrĩpererã ĩgũ merã wádiya dekode wãiyesũrã irirosũ waanerã ããrĩmá. Iri merã ĩgũyarã ããrĩrĩrẽ ĩmunerã ããrĩmá. ³ ĩgũsã ããrĩpererã Marĩpũ sĩdea ãmũgasima baarire baanerã ããrĩmá. ⁴ ããrĩpererã Marĩpũ ãtãyegue deko wiridoredeare iirĩnerã ããrĩmá. Cristo iri ãtãye irirosũ ããrĩdi ããrĩmĩ. ĩgũta okari sĩdi ããrĩmĩ. Irasirigũ ĩgũta ĩgũsãrẽ wapikũwãgãdi ããrĩmĩ. ⁵ Marĩpũ ĩgũsãrẽ õãrõ iritamukerepũrũ, wárã ĩgũ dorerire tarinũgãnerã ããrĩmá. ĩgũsã irasirimakũ ĩãgũ, Marĩpũ ĩgũsãrẽ ĩãsuyubiridi ããrĩmĩ. Irasirigũ ĩgũsãrẽ masaka marĩrõgue boamakũ iridi ããrĩmĩ ĩgũ dorerire tarinũgãdea waja.

⁶ ããrĩpereri ĩgũsãrẽ waadea kere, marĩrẽ ĩgũsã iriderosũ ñerĩrẽ iribirikõãburo, ãrĩ keori pídea ããrã. ⁷ Irasirirã, keori weadeare surãyeri ĩgũsã bũremuderosũ bũremubirikõãka! Keori weadeare ĩgũsã bũremudeare Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Masaka baa, iirĩ odo, bosenũ irinũgãnerã ããrĩmá”, ãrĩ gojasũdero ããrĩbũ. ⁸ Pũrũ surãyeri ãma nomerẽ ñerõ iri gãmebiranerã ããrĩmá. ĩgũsã iriderosũ iribirikõãrõ gããmea marĩrẽ. ĩgũsã ñerõ iriri waja, sunũrẽ veintitrés mil masaka boanerã ããrĩmá. ⁹ Gajipoe gajerã: “Marĩpũ guare õãrõ korebemi”, ãrĩ werewũanerã ããrĩmá. ĩgũsã ãrĩderosũ ãrĩbirikõãrõ gããmea marĩrẽ. ĩgũsã ñerõ werenĩrĩ waja ĩgũsãrẽ ãña kũrĩ wẽjẽnerã ããrĩmá. ¹⁰ Gajipoe gajerã ĩgũsã Marĩpũ irideare ñerõ ãrĩ werewũamakũ, Marĩpũre wereboegu ĩgũsãrẽ wẽjẽdi ããrĩmĩ. ĩgũsã ãrĩderosũ ãrĩbirikõãrõ gããmea marĩrẽ.

¹¹ Marĩrẽ inũ marãrẽ i ãmũ pereburo mérõgã

dɥawāgāriro yáa. Irasirigu Marĩpu ĩgũya werenĩri gojadea pũgue gwa ñekũsāmarārē ĩgũ wajamoādeare gojadoredi āārĩmĩ, ĩgũsā iriderosũ ñerō iribirikōāburo, ārĩgũ. ¹² Sugũ: “Yũ tamerā Marĩpure ōārō buremusiā, ñerō iribirikoa”, ārĩ gũñagũno, ōārō pemasĩka, iripoegue marā iriderosũ ñerĩrē iriri, ārĩgũ! ¹³ Gajipoere marĩ āārĩpererā sugũ dɥyaro marĩrō ñerĩrē iriduarā, wātĩ ñerĩ ārĩmesāsũrā, ñerō tarirā āārā. Irasũ āārĩkererũ, Marĩpu gapũ ĩgũ ārĩderosũta marĩrē iritamunĩkōāmi ñerĩrē tarinugāburo, ārĩgũ. Marĩ ñerĩrē tarinugānemomasĩbirimakũ ĩāgũ, gaji ñerĩrē tau kāmutangukumi marĩrē poyanorĩrĩ, ārĩgũ. Irasirigu marĩrē ĩgũ merā gũñaturamakũ irigukumi ñerĩrē iribirikōāburo, ārĩgũ.

¹⁴ Yaarā yũ maĩrā, yũre péka! Neō keori weadeare buremubirikōāka! ¹⁵ Musā ōārō pemasĩrā āārĩmakũ, irire musārē werea. Irasirirā yũ ārĩrĩrē: “Diayeta āārā”, ārĩ masiā. ¹⁶ Marĩ nerē bokatĩrĩrā Marĩpure: “Ōāa”, ārĩ, usuyari sĩ odo, igui deko iirĩripare iirĩa. Irasũ iirĩrā: “Cristo boagũ, marĩ ñerĩ iridea wajare ĩgũ dí béodea merā wajaribosadi āārĩmĩ”, ārĩ ĩmua. Pārũrē marĩ dukawa baarā: “Cristo ĩgũya dupũ curusague boadea merā marĩrē ĩgũyarā āārĩmakũ iridi āārĩmĩ”, ārĩ ĩmua. ¹⁷ Marĩ wārā āārĩkererā, suru pārũrē dukawa baarā, āārĩpererā marĩ Cristoyarā su dupũta irirosũ āārā. Irasirirā sugũyarāta āārā.

¹⁸ Gũyarā Israel marā Moisés dorederosũta iririre gũñaka! Marĩpure buremurā, ĩgũya wiigue waibũre āiā wējē soema. Wējē soe odo, Marĩpu ĩũrō diire baama. Irasũ baarā: “Marĩpũyarā āārā”, ārĩ ĩmuma. ¹⁹ Yũ ire irasũ ārĩgũ: “Keori

weadea wajakua, irasiro iri keori weadea puro waibu dií pídea, gaji waibu dií nemorõ ããrã”, ãrĩgũ meta yáa. ²⁰ Āsũ gapu ãrĩ werea. Marĩpũre masĩmerã, keori weadea puro waibu dií pírá, Marĩpũre buremubema. Wãtẽa gapũre buremurã yáma. Īgũsã irasũ buremumakũ, Īgũsã buremurĩ wiigũe mũsã Īgũsã merã baarã: “Wãtẽayarã ããrã”, ãrĩ ĩmurã irirosũ yáa. Mũsã irasirimakũ, neõ gããmebea. ²¹ Marĩ Opũ Jesucristoyarã ããrĩsĩã, ĩgũrẽ buremurã nerẽ bokatĩrĩã, igui deko iirĩripare iirĩ, pãrũrẽ dukawa baáa. Gajerã ĩgũsã keori weadeare buremurã iirĩri, waibu dií ĩgũsã baari, wãtẽaya ããrã. Irasirirã marĩ Opũ Jesúyare baarã, wãtẽayare baamasĩbea. Irasũta wãtẽayare baarã, Jesúyare baamasĩbea.

²² Marĩ Opũ ĩgũyarãrẽ ĩgũ direta buremumakũ gããmemi. Irasirirã marĩ wãtẽãrẽ buremurã, marĩ ĩgũrẽ guamakũ iribokoa. Īgũ guamakũ, marĩ ĩgũrẽ tarinũgãmasĩbirikoa. Marĩrẽ wajamoãburire kãmutamasĩbirikoa.

Marĩpũ gããmerĩ direta irika! ãrĩ gojadea

²³ Masaka surãyeri ãsũ ãrĩ werenĩma: “Marĩ iridũarire noó gããmerõ irimasĩa”, ãrĩ werenĩma. Īgũsã irire irasũ ãrĩkerepũũ, ããrĩpereri marĩ iridũarire irirã, gajerãrẽ iritamurã meta yáa. Noó marĩ gããmerõ irirã, gajerãrẽ Marĩpũre buremunemomakũ iribiribokoa. ²⁴ Marĩya ããrĩburi direta gũñabirikõãrõ gããmea. Gajerãya ããrĩburidere gũñarõ gããmea.

²⁵ Irasirirã baari duarogue baarire wajarirã, noó gããmerõ wajari baaka! “¿I baari keori weadea pũrogue pídea ããrĩrĩ?” ãrĩ sërẽñabirikõãka: “Irire

baarã, ñerõ irirã yáa”, ãrĩ gũñarĩ, ãrĩrã! ²⁶ Marĩpuya werenĩrĩ gojadea pũgue ãsũ ãrĩ gojasũdero ããrĩbú: “Ããrĩpereri i ùmuma, marĩ Opuya ããrã”, ãrĩ gojasũdero ããrĩbú. Irasirirã ããrĩpereri Ìgũ baari pídeare baamasĩa.

²⁷ Jesúre bũremubi mũsãrẽ baadoregũ siiumakũ, waaduarã waaka! Baarã waarã, mũsãrẽ Ìgũ ejorire baaka! “¿I baari, keori weadea pũrogue pídea ããrĩrĩ?” ãrĩ sërẽñabirikõãka: “Irire baarã, ñerõ irirã yáa”, ãrĩ gũñarĩ, ãrĩrã! ²⁸ Gajigũ iro ããrĩgũ ãsũ ãrĩbokumi mũsãrẽ: “I baari, keori weadea pũrogue pídea dii ããrã”, ãrĩbokumi. Ìgũ irasũ ãrĩmakũ, iri diire baabirikõãka! Ìgũ, mũsã baamakũ: “Ñerĩrẽ irirã yáama”, ãrĩ gũñabokumi. Ìgũ irasũ ãrĩ gũñabirikõãburo, ãrĩrã, irire baabirikõãka! ²⁹ Yũ irire ãrĩgũ, Ìgũ gũñarĩrẽ werenígũ yáa. Mũsã gũñarĩrẽ wereníbea.

Mũsã gapũ ãsũ ãrĩ sërẽñabokoa yũre: “¿Nasirirã, gajigũ diaye gũñabiri waja, gũa iriduarire gorawayubokuri? ³⁰ Gũa baarire Marĩpũre: ‘Õãa’, ãrĩ, usuyari sĩmakũ, gajigũ gũa baarire werewamasĩbemi”, ãrĩbokoa mũsã yũre. ³¹ Yũ gapũ ãsũ ãrĩ werea mũsãrẽ. Mũsã baa, iirĩrã, gajinorẽ irirãde, Marĩpũ gããmerĩ direta irika, gajerãde Ìgũrẽ: “Õãtarigũ ããrĩmi”, ãrĩ bũremuburo, ãrĩrã! ³² Neõ mũsã iriri merã judío masakare, judío masaka ããrĩmerãrẽ, Marĩpũyarãdere ñerõ irimakũ iribirikõãka! ³³ Yũ irirosũ irika! ããrĩpereri yũ iriri merã masaka ããrĩpererãrẽ õãrõ iridũáa. Irasirigũ õãrõ yũ ããrĩburi direta gũñabea. Gajerãya ããrĩburi gapũre õãrõ gũñáa, Ìgũsãde Jesucristore bũremuburo, ãrĩgũ. Ìgũrẽ bũremumakũ, Ìgũsãrẽ

taugakumi, peamegue waabirikõãburo, ãrĩgũ.

11

¹ Irasirirã yḡ Cristore irituyarosũta mḡsãde yḡre irituyaka!

Jesúre bḡremurã nerẽrõgue nome iririmarẽ go-jadea

² Yaará, yḡre mḡsã gũñamakũ, ããrĩpereri yḡ buedeare keoro irimakũ ãgũ, mḡsãrẽ: “Óãrõ yáa”, ãrĩ, ḡḡyari merã werea. ³ Gaji mḡsãrẽ masĩmakũ gããmea. Cristo, ããrĩpererã ḡma dipuru ããrĩmi. ḡmḡḡ, marãpore igo dipuru ããrĩmi. Marĩḡḡ, Cristo dipuru ããrĩmi. ⁴ Mḡsã Marĩḡḡre bḡremurã nerẽmakũ, sugḡ Marĩḡḡre sērẽgũ, Marĩḡḡ ãgũrẽ weredoredeare weregḡ, ãgũya dipurure bḡḡabirikumi. ãgũya dipurure bḡḡagu, gḡyasĩũrõ irigḡ iribokumi. Cristore ãgũ Orḡḡre gopeyari merã bḡremubiribokumi. ⁵ Nomeõ garḡḡ Marĩḡḡre sērẽgõ, Marĩḡḡ igoire weredoredeare werego, igoya dipurure bḡḡakumo. Igoya dipurure bḡḡabeo, gḡyasĩũrõ irigo iribokumo. Marãḡḡre igo dipurure gopeyari merã bḡremubiribokumo. Poari pera wḡḡabéodeo irirosũ ããrĩbokumo. ⁶ Igoya dipurure bḡḡadḡabirimakũ, diayeta igoya poarire pera wḡḡabéokõãrõ gããmea. Igoya poarire pera wḡḡabéodḡabeo: “Gḡyasĩũgoráa”, ãrĩgõ, igoya dipurure bḡḡaburo. ⁷ ḡmḡḡ garḡḡ Marĩḡḡ irirosũ orḡḡ ããrĩsĩã, ãgũya dipurure bḡḡabirikõãburo, Marĩḡḡ yḡ Orḡḡ ããrĩmi, ãrĩ ãmubu. Nomeõ garḡḡ igoya dipurure bḡḡaburo, ḡmḡḡ yḡ orḡḡ ããrĩmi, ãrĩ ãmubo. ⁸ Neõgoraguere Marĩḡḡ ḡmḡḡrẽ irigḡ, nomeõya gõã merã iribiridi ããrĩmí. Nomeõ garḡḡre

ũmũya gõã merã iridi ããrĩmĩ. ⁹ Irasirigu ãmũurẽ irigu, nomeõrẽ iritamubure iribiridi ããrĩmĩ. Nomeõ gapure, ãmũurẽ iritamubore iridi ããrĩmĩ. ¹⁰ Irasirirã musã Marĩpure buremurã nerẽrõguere, nome ãgũsãya dipure bũuaro gããmea. Irasũ bũuarã, ãmũu dorerire õãrõ yujũrire ãmurãkuma. ãgũsã irasiririre Marĩpure wereboerã ããrãkuma. ¹¹ Irasũ ããrĩkerepurũ, marĩ Jesucristore buremurã gãme iritamua. Őma, nome iritamurĩ marĩrõ ããrĩmasĩbirikuma. Nomedede ũma iritamurĩ marĩrõ ããrĩmasĩbirikuma. ¹² Diayeta ããrã. Marĩpure nomeõrẽ ãmũya gõã merã iridi ããrĩmĩ. Ide diayeta ããrã. Őma, nome merã deyoama. Irasirirã ããrĩpererã masaka: ũma, nomedede Marĩpure irinerã ããrĩma.

¹³ I ããrĩpereri diayeta ããrĩmakũ, ¿musã basi naásũ gũñarĩ? Musã Marĩpure buremurã nerẽrõgue, nomeõ igoya dipurure bũuabeota, Marĩpure sërẽmakũ ¿õãrĩ, o õãberi? ¹⁴ Őmũu poañapu ũmamakũ gũyasĩũgorãa. ããrĩpererã masaka irire masĩma. ¹⁵ Nomeõ poañapu ũmagõ ããrĩmakũ: “Õãgorãa”, ãrã. Igo poañapu ũmamakũ, igoya dipuru bũuaro irirosũ ããrã. ¹⁶ Yũ werenĩrĩrẽ: “Irasũ ããrĩbea”, ãrĩ guaseodũagunorẽ ãsũ ãrĩ weregũra. Marĩ Jesũre buremurã, gajerã Marĩpureyarãde irire irasũ dita yãa.

Marĩ Opũ Jesucristo boadeare gũñarã, ãgũ nerẽ baadorederosũ keoro iribiridea

¹⁷ Dapora musãrẽ gaji gojãa. Irire gojagu, yũ musãrẽ: “Õãrõ irirã yãa”, ãrĩbea. Musã nerẽrã, õãrõ iriboanerã, ubu gapũ poyanorẽayuro. ¹⁸ Irasirigu ãsũ ãrĩ werepurorigũra musãrẽ. Musã nerẽrã, gãme guaseo dukawariayuro. Gajerã yũre irire

weremakũ pégu: “Diayeta ããrĩkoa”, ãrĩ gũñáa.
 19 Mũsã gãme dukawarirã, ãsũ ãrĩ gũñakoa: “Marĩrẽ
 gãme dukawariro gããmea. Irasirirã, ¿noã gapu
 Jesucristoyarãgora ããrĩrĩ? ãrĩ masĩrãkoa”, ãrĩkoa.
 20 Irasirirã mũsã gãme dukawariri waja, mũsã
 marĩ Opũ Jesucristo boadeare nerẽ gũñarã, ãgũ
 buerã merã baatũnugũ dorederosũ keoro iirĩ,
 baabea. 21 Mũsã nerẽ baarã, surãyeri noó gããmerõ
 baapũrorikõãa. Gajerã uaboama. Gajerã mejãma.
 22 Mũsã noó gããmerõ iirĩ, baadũarã, ¿nasirirã
 mũsãya wiirigüe baa, iirĩberi? Mũsã Marĩpũyarã
 ããrĩkererã, noó gããmerõ baa, iirĩrã, mũsã nerẽrĩrẽ
 wajamarĩrõsũ irirã yáa. Mũsã watopegue ããrĩrã
 baari opamerãrẽ gũyasĩũrõ tarimakũ irirã yáa.
 Mũsã irasiriri kerere pégu, ¿naásũ ãrĩ weregũkuri
 yu mũsãrẽ? “Õãrõ irirã yáa”, ãrĩbirikoa.

*Marĩ Opũ Jesucristo ãgũ buerã merã baatũnudeare
 gojadea*

23-24 Marĩ Opũ Jesucristo yũre buedeare yu
 mũsãrẽ werebu. Iri ãsũ ããrã. ãgũrẽ wẽjẽduarãguere
 ãgũrẽ Judas ãmuburi dupuyurõma ñamita marĩ Opũ
 Jesucristo pãrũrẽ ãĩ, Marĩpũre: “Mũrẽ usũyari
 sĩa”, ãrĩ, irirure pea, ãgũ buerãrẽ: “I yaa dupũ
 ããrã”, ãrĩ gueredi ããrĩmĩ. “Irasirirã yu mũsã
 merã dapora iriaderosũ nerẽ, pãrũrẽ baarikũ, yu
 mũsãrẽ boabosarire gũñaka!” ãrĩdi ããrĩmĩ. 25 ãgũsã
 baa odoadero pũrũ, pãrũrẽ ããderõsũta iirĩripare ãĩ,
 ãsũ ãrĩdi ããrĩmĩ: “Yũ mũsãrẽ boabosagu yaa dí
 béori merã Yũpũ mũsãrẽ: ‘Õãrõ irigũra’, ãrĩdeare
 iriyuwarikũgũkumi. Irasirirã mũsã nerẽ, iirĩripare
 iirĩrikũ, yu dí béobosarire gũñaka!” ãrĩdi ããrĩmĩ. 26 ãgũ

ãrĩderosũta irirã, marĩ nerẽrã, pãrũrẽ baarikũ, iirĩripare iirĩrikũ: “Marĩ Opũ Jesucristo marĩrẽ boabosadi ããrĩmĩ”, ãrĩ ĩmurãkoa. Irire irinĩkõãrõ gããmea. Ĩgũ i ũmũgue dupaturi aarimakũ, irire irinemobirikoa.

Marĩ Opũ Jesucristo boadeare gãñarã, ãsũ iridorea, ãrĩ gojadea

²⁷ Marĩ Opũ Jesucristo boadeare marĩ nerẽ gãñaripoe Marĩpũre bũremurĩ marĩrõ merã pãrũrẽ baa, iirĩripare iirĩgũno ñerõ irigũ yãmi. Jesucristo marĩrẽ boabosagũ dí béodeare ubu ããrĩrĩ irirosũ gãñami. ²⁸ Irasirirã pãrũrẽ baa, iirĩripare iirĩburi dupuyuro masakakũ marĩ irideare: “Ñerõ irikubũ”, ãrĩ gãñapũroriro gããmea. ²⁹ Marĩ Opũ Jesucristoya dupũ ããrĩrĩrẽ pémasĩrõ marĩrõ merã pãrũrẽ baa, iirĩripare iirĩmakũ, Marĩpũ marĩrẽ wajamoãgũkumi. ³⁰ Mũsã irire pémasĩbiridea waja wãrã mũsã merãmarã pũrĩrikurã, turamerã ããrĩma. Surãyeri boakõãsiamã. ³¹ Marĩ baa, iirĩburi dupuyuro marĩ irideare: “Ñerõ irikubũ”, ãrĩ gãñapũrorimakũ, marĩ Opũ marĩrẽ wajamoãbirikumi. ³² Marĩ Opũ gapũ marĩrẽ ĩgũyarãrẽ marĩ ñerĩ iririre piriburo, ãrĩgũ, wajamoãmi. Irasirigũ ĩgũrẽ bũremumerãrẽ peamegue waadore, marĩ gapũre ĩgũsã merã wajamoãbirikumi.

³³ Irasirirã yaarã, mũsã nerẽ baarã, suro merã baamurã gajerãdere yũka! ³⁴ Uboagũno ĩgũya wiigue baaburo. Irasirimakũ, mũsã õãrõ nerẽ baamakũ, Marĩpũ mũsãrẽ wajamoãbirikumi. Gajire mũsã pũroge waagũ, õãrõ were ãmũgũra.

12

*Ōāgū deyomarīgū Marīpuyare marirē
irimasīmakū iririre gojadea*

¹ Yaarā, Ōāgū deyomarīgū Marīpuyare marirē irimasīmakū irigū āārīmi. Yu irire musārē ōārō masīmakū gāāmea. ² Musā ire ōārō masīsiāa. Jesucristore b̄remuburi dupuyuro keori weadeare b̄remutuyanerā āārībū. Iri keori weadea okari opabea. Neō werenībea. ³ Irasirigū daporare yu musārē ire masīmakū gāāmea. Neō sugū Ōāgū deyomarīgū iritamurī merā weregū: “Jesūre ñerō waanaburo”, ārīmasībirikumi. Gajigū Ōāgū deyomarīgū iritamurī marirō merā weregū: “Jesús marī Op̄ āārīmi”, neō ārīmasībirikumi.

⁴ Ōāgū deyomarīgū Marīpuyare marirē irimasīmakū iriri, wári āārā. Īgū sugūta irire sīgū āārīmi. ⁵ Marī Op̄ Jesucristo marirē moādoreri, wári āārā. Īgū sugūta irire moādoregū āārīmi. ⁶ Marīpuyare iriri, s̄rosū āārībea. Marīp̄ sugūta marī āārīpererārē ĩgūyare ōārō irimasīmakū irigū āārīmi. ⁷ Marīp̄ Ōāgū deyomarīgūrē marī masakakure s̄rī merā ĩgū marī merā āārīrīrē ĩmumi, āārīpererā Jesucristore b̄remurārē gāme iritamuburo, ārīgū. ⁸ Ōāgū deyomarīgū surāyerire ōārō masīrī merā Marīpuyare weremakū yāmi. Gajerādere ōārō pēmasīrī merā ĩgūyare weremakū yāmi. ⁹ Gajerārē: “Marīp̄ iritamurī merā marī ōārō irimasīa”, ārī b̄remumakū yāmi. Irasū āārīmakū, gajerārē ĩgū turarire s̄mi pūrīrikurārē tauburo, ārīgū. ¹⁰ Gajerārē ĩgū turari merā iri ĩmurīrē irimasīmakū yāmi. Gajerārē Marīp̄ ĩgūsārē

weredorerire õãrõ weremasĩmakũ yámi. Gajerãrẽ: “Wãtĩ turari merã, o Õãgũ deyomarĩgũ turari merã ãsũ yámi ã”, ãrĩ masĩrĩrẽ sĩmi. Gajerãrẽ gaji masã ya werenĩrĩ merã ãgũsã dupuyurogue werenĩmasĩbirideare werenĩmasĩmakũ yámi. Gajerãrẽ, iri werenĩrĩrẽ masĩbirikererã, Õãgũ deyomarĩgũ iritamurĩ merã: “Ãsũ ãrĩduaro yáa i”, ãrĩ masĩmakũ yámi. ¹¹ Õãgũ deyomarĩgũ marĩ masakakure gajerosũperi dita ãgũ sĩduarire sĩmi. ãgũ sugũta Marĩpũyare marĩ irimasĩburire sĩgũ ããrĩmi.

Marĩ Cristoyarã ããrĩã su dupũta irirosũ ããrã, ãrĩ gojadea

¹² Marĩya dupũma wári ããrã. Wári ããrĩkerero, su dupũta ããrã. Cristode irasũta ããrĩmi. Marĩ ãgũrẽ bũremurã wãrã ããrĩkererã, su dupũta irirosũ ããrã. ¹³ Murãrõta marĩ ãgũrẽ bũremurã ããrĩpererã: judío masaka, judío masaka ããrĩmerã, gajerãrẽ moãboerã, moãboemerãde wãrã ããrĩkererã, Õãgũ deyomarĩgũ sugũ merãta wãĩyesũbũ. Irasirĩgũ marĩrẽ su dupũta irirosũ ããrĩmakũ yámi. Irasirirã marĩ ããrĩpererã Õãgũ deyomarĩgũrẽ opãa.

¹⁴ Marĩya dupũma ããrĩrĩ su wãita ããrĩbea. Wári ããrĩkõãa. ¹⁵ Marĩya gubu werenĩrĩ gubu ããrĩrõ ãsũ ãrĩbokoã: “Mojõ ããrĩbea. Irasiriro mũya dupũma ããrĩbea”, ãrĩbokoã. Marĩya gubu irasũ ãrĩkerero, marĩya dupũmata ããrã. ¹⁶ Marĩya gãmipũ werenĩrĩ gãmipũ ããrĩrõ ãsũ ãrĩbokoã: “Koyeru ããrĩbea. Irasiriro mũya dupũma ããrĩbea”, ãrĩbokoã. Marĩya gãmipũ irasũ ãrĩkerero, marĩya dupũmata ããrã. ¹⁷ Marĩya dupũ, koyeru dita ããrĩmakũ,

¿nasirisĩã, pébokuri marĩ? Marĩya dupu, gãmipũ dita ããrĩmakũ, ¿nasirisĩã, gajinorẽ wĩjĩbokuri marĩ? 18 Marĩpu marĩya dupure irigu, ããrĩpereri ĩgũ gããmerõsũta keoro iridi ããrĩmĩ. 19 ããrĩpereri marĩya dupugue ããrĩrĩno su wãita ããrĩmakũ, marĩya dupu marĩbokuyo. 20 ãsũ ããrã. Marĩya dupugue ããrĩrĩ wãri ããrĩkerepu, su duputa ããrã. I irirosũta marĩ Jesũre buremurã wãrã ããrĩkererã, su duputa irirosũ ããrã.

21 Irasiriro koyeru, mojõrẽ: “Murẽ gããmebea”, ãrĩmasĩbirikoa. Dipuru, guburire: “Murẽ gããmebea”, ãrĩmasĩbirikoa. 22 ãsũ gapu ããrã. Gaji marĩya dupugue ããrĩrĩ, turabiri ããrĩkerepu, marĩ gapu irire buro gããmea. 23 Gaji marĩya dupugue ããrĩrĩrẽ: “Ubu ããrĩrĩ ããrã”, ãrĩ gũñãa. Irasirirã irire õãrõ deyoburo, ãrĩrã, õãrõ ãmua. Gaji marĩ guyasĩrĩsãrĩrẽ surĩ sãña kãmutãa masaka ĩãbirikõãburo, ãrĩrã. 24 Gaji marĩya dupugue ããrĩrĩrẽ õãrĩ deyori gapure ãmubea. Marĩpu marĩya dupugue ããrĩrĩrẽ ããrĩpererire õãrõ ãmudi ããrĩmĩ, su duputa õãrõ dupukuburo, ãrĩgũ. Irasirigu: “Ubu ããrĩrĩ ããrã”, marĩ ãrĩrĩ gapure õãrõ gããmemakũ yãmi. Irasirirã marĩ neõ gajigu Jesũyagure: “Ubu ããrĩgũ ããrĩmi, irasirirã ĩgũrẽ gããmebea”, ãrĩbirikõãrõ gããmea. 25 ãsũta ããrĩdoredi ããrĩmĩ, Marĩpu marĩya dupu suro merã iritamuburo, ãrĩgũ. 26 Marĩya dupugue ããrĩrĩ su wãĩ ñerõ tarimakũ, gajide ããrĩpereri ñerõ taria. Su wãirẽ õãrõ ãmumakũ: “Marĩya dupu ããrĩperero õãrõ ããrã”, ãrĩ gũñãa.

27 Yu irire ãrĩgũ, ãsũ ãrĩduagu yãa. Marĩ Cristore buremurã ĩgũya dupu irirosũ ããrã.

Irasirirã marĩ masakakũ ãgũya dupugue ããrĩã irirosũ ããrã. ²⁸ Irasirigũ Marĩpũ marĩ Jesúre buremurãrẽ gãme iritamuburire pígu, ãsũ pídi ããrĩmĩ. Jesucristo buedoregũ pĩnerãrẽ pípuroridi ããrĩmĩ. Pũrũ Marĩpũ gajerãrẽ ãgũ weredorerosũ weremurãrẽ pídi ããrĩmĩ. Pũrũ gajerãrẽ ãgũyare buemurãrẽ pídi ããrĩmĩ. Gajerãrẽ ãgũ turaro merã iri ãmumurãrẽ, gajerãrẽ pũrĩrikũrãrẽ taumurãrẽ, gajerãrẽ masakare iritamumurãrẽ, gajerãrẽ dorerimasã ããrĩmurãrẽ, gajerãrẽ gaji masã ya merã ãgũsã dupuyurogue neõ werenĩmasĩbirideare werenĩmasĩmurãrẽ pídi ããrĩmĩ. ²⁹ Irasirigũ marĩ ããrĩpererãrẽ sũrosũ irimurãrẽ píbiridi ããrĩmĩ. Irasirirã marĩ ããrĩpererã Jesucristo buedoregũ pĩnerã meta ããrã. Marĩ ããrĩpererã Marĩpũ weredorerosũ wererã meta ããrã. Marĩ ããrĩpererã Marĩpũyare buerã meta ããrã. Marĩ ããrĩpererã Marĩpũ turaro merã iri ãmumurã meta ããrã. ³⁰ Marĩ ããrĩpererã pũrĩrikũrãrẽ taumasĩrã meta ããrã. Marĩ ããrĩpererã gaji masã ya werenĩrĩ merã werenĩmasĩrã meta ããrã. Marĩ ããrĩpererã ãgũsã werenĩrĩrẽ péadero pũrũ: “Ãsũ ãrĩduaro yãa”, ãrĩ wererã meta ããrã. ³¹ Irasirirã Õãgũ deyomarĩgũ Marĩpũyare irimasĩrĩ sĩrĩrẽ gããmekã musã! Yũ musãrẽ i ããrĩpereri nemorõ õãrĩrẽ weregũra.

13

Gãme maĩrĩmarẽ gojadea

¹ Marĩ gaji masã ya werenĩrĩrẽ werenĩmasĩkererã, Marĩpũre wereboerã ya werenĩrĩrẽ werenĩmasĩkererã, gajerãrẽ maĩbirimakũ, marĩ werenĩrĩ wajamarĩboka.

Kōme maji pábiramakū busurosū marī wereníri busukōãbokoá. ² Marĩpũ marĩrẽ weredorerosū òãrõ weremasĩkererã, gajerãrẽ maĩbirimakū, marĩ wereri wajamarĩbokoá. ããrĩpererire masĩkererã, Marĩpũyare masaka dupuyurogue masĩbiridea ããrĩpererire pémasĩkererã, gajerãrẽ maĩbirimakū, marĩ masĩrĩ wajamarĩbokoá. Marĩpũre bũremurĩ marĩrẽ ĩgũ sĩrĩ merã buúrure gajerogue waadoremasĩkererã, gajerãrẽ maĩbirimakū, marĩ bũremurĩ merã iriri wajamarĩbokoá. ³ Marĩ opari ããrĩpereri boporãrẽ sĩkererã, ĩgũsãrẽ maĩbirimakū, marĩ iriri wajamarĩbokoá. Marĩpũyare marĩ iridea waja marĩya dupũre masaka soekerepũrũ, marĩ gajerãrẽ maĩbirimakū, Marĩpũ marĩrẽ: “Òãrõ iribũ”, ãrĩbiribokumi.

⁴ Marĩ gajerãrẽ maĩrã, mata ĩgũsã merã guaña máa. ĩgũsãrẽ bopoñarĩ merã òãrõ yáa. ĩgũsãrẽ ĩãturiña máa. “Ĩgũsã nemorõ òãgũ ããrã”, ãrĩmasĩña máa. “Ĩgũsã nemorõ masĩtarinugãgũ ããrã”, ãrĩmasĩña máa. ⁵ Marĩ gajerãrẽ maĩrã, ĩgũsãrẽ bũremurĩ merã keoro werea. Marĩya ããrĩburi direta gũñabea. ĩgũsãya ããrĩburidere gũñáa. ĩgũsãrẽ guari merã wereña máa. ĩgũsã marĩrẽ ñerõ irimakū, yoaripoe ĩgũsã merã guanĩña máa. ⁶ Gajerãrẽ maĩrã, ĩgũsã ñerõ irimakū ĩãrã, usuyamasĩña máa. Diayema gapũre ĩgũsã irimakū ĩãrã, usuyáa. ⁷ Marĩ gajerãrẽ maĩrã, ĩgũsã ñerõ irimakū ĩãrã, masakare neõ kere werebea. Gajerã ĩgũsãrẽ werewũakerepũrũ, marĩ ĩgũsãrẽ bũremurĩrẽ neõ piribirikoa. “Pũrũgue ĩgũsãde òãrĩ gapũre irirãkuma”, ãrĩ gũñáa. ĩgũsã iriri merã marĩ ñerõ tarikererã, ĩgũsãrẽ maĩsĩã, neõ piribeá.

⁸ Marĩ gãme maĩrĩ neõ perebirikoa. Marĩpũ weredorerosũ wereri gapũ pererokoa. Gaji masã ya merã marĩ werenĩrĩde pererokoa. Marĩpũyare masĩrĩ merã õãrõ wereride, pũrugue pererokoa. Iri irasũ waamakũ, marĩ masĩdero nemorõ ããrĩpererire masĩrãkoa. ⁹ Daporare marĩ ããrĩpereri Marĩpũyare masĩbea. Īgũ weredorerosũta Īgũ masĩrĩ sĩrĩ merã werekererã, ããrĩpereri Īgũyare weremasĩbea. ¹⁰ Pũrugue Jesucristo Marĩpũyare masĩpeogu aarimakũ, marĩ masĩbirideare masĩpeorãkoa.

¹¹ Yũ majĩgũ ããrĩgũ, majĩrã irirosũ gũñarĩ marĩrõ werenĩ, Īgũsã irirosũta iriunabu. Yũ bũguro waagũ, majĩrã irirosũ ããrĩdeare pirikõãbũ. ¹² Daporare Marĩpũyare marĩ õãrõ masĩbea. Diuru bũguru merã marĩ ãĩnamakũ õãrõ deyomarĩrõ irirosũ ããrã. Õãrõ deyobea. Pũrũ õãrõ deyorogue Marĩpũre ĩãrãkoa. Daporare marĩ ĩgũrẽ sĩrũgã masĩa. Pũrũ Marĩpũ marĩrẽ masĩpeorosũta marĩde masĩpeorãkoa.

¹³ Daporare urre wãĩ ããrã: Marĩpũre bũremurĩ, Īgũ marĩrẽ õãrõ irigũkumi, ãrĩ usũyari, marĩ gãme maĩrĩ ããrã. Iri urre wãĩ neõ perebirikoa. Gãme maĩrĩ gapũ gaji nemorõ õãrĩ ããrã.

14

Gaji masã ya werenĩrĩ merã marĩ werenĩmasĩbirikererã werenĩrĩmarẽ gojadea

¹ Gajerãrẽ maĩnemoka! Irasũ ããrĩmakũ, Marĩpũyare Õãgũ deyomarĩgũ mũsarẽ irimasĩrĩ sĩrĩrẽ gããmekal! ããrĩpereri Īgũ irimasĩrĩ sĩrĩrẽ gũñarã, gaji nemorõ Marĩpũ weredorerosũ

weremasĩrĩ gapũre bũro gããmek! ² Sugũ gaji masã ya werenĩrĩ merã werenĩmasĩbirikeregu werenĩmakũ, Marĩpũ dita ĩgũ werenĩrĩrẽ pėmi. Masaka gapũ ĩgũ werenĩrĩrẽ pėbema. Ōãgũ deyomarĩgũ turari merã Marĩpũyare masĩña marĩdeare werenĩmi. ³ Marĩpũ weredorerosũ weregu gapũ masakare weremi. ĩgũ wereri pėrãrẽ Jesucristore bũremunemomakũ yãmi. ĩgũ wereri merã ĩgũsãrẽ ōãrō ããrĩrikũmakũ, ōãrō yũjũpũrãkũmakũ yãmi. ⁴ Gaji masã ya werenĩrĩ merã werenĩmasĩbirikeregu werenĩgũ ĩgũ basi Jesucristore bũremunemogũ yãmi. Marĩpũ weredorerosũ weregu gapũ gajerã Jesucristore bũremurãrẽ ĩgũrẽ bũremunemomakũ irigu yãmi.

⁵ Gaji masã ya werenĩrĩ merã mũsã werenĩmasĩbirideare ããrĩpererã mũsã werenĩmasĩmakũ gããmea yũ. Iri nemorō Marĩpũ weredorerosũ mũsã weremakũ bũro gããmea. Marĩpũ weredorerosũ weregu gapũ, gaji masã ya werenĩrĩ merã werenĩgũ nemorō masakare iritamugũ ããrĩmi. Irasũ ããrĩkerepũrũ, gaji masã ya werenĩrĩrẽ pėgu: “Āsũ ãrĩduaro yãa”, ãrĩ weremakũ ōãgorãa. ĩgũ irasũ ãrĩ weregu, Jesucristore bũremurãrẽ ĩgũrẽ bũremunemomakũ irigu yãmi. ⁶ Yaarã, yũ mũsã pũrogu waagũ, gaji masã ya werenĩrĩ merã werenĩgũ, mũsãrẽ iritamubiribokoa. Marĩpũ ĩgũyare yũre masĩmakũ irideare weregu, ĩgũya diayema kerere masĩrĩ merã weregu, ĩgũ yũre weredorerire weregu, ĩgũyare mũsãrẽ buegu, mũsãrẽ iritamubokoa.

⁷ Keori merã mũsãrẽ weregũra. Těrėdirure keoro puribirimakũ, o arpa wãĩkũro bũapũtěrōde

keoro buaputēbirimakū, iri wāi bayari āārīkoa, ārīmasīña máa. ⁸ Surara gāmewējērā waaburi dupuyuro sug_u ĩgūsā merām_u puridirure keoro puribirimakū, gajerā surara ĩgūsā mojōkuburire āmubirikuma. ⁹ Musāde irasūta āārā. Musā gaji masā ya werenírī merā werenímakū pérā: “Āsū ārīrā irikuma ĩgūsā”, ārīmasībirikuma. Irasirirā musā ubugorata werenímoāmākōārā irikoa. ¹⁰ I ũm_uguere wári buri marā āārīma. ĩgūsā basi ĩgūsā werenírīrē pémasīma. ¹¹ Y_u gaji masā ya werenírī merā werenígūrē pébi: “Gajerom_u āārīmi”, ārī gūñag_ukoa. ĩgūde y_u gaji masā ya werenírī merā werenímakū pébi y_ure: “Gajerom_u āārīmi”, ārī gūñag_ukumi. ¹² Irasūta āārā musādere. Musā Ōāgū deyomarīgū turaro merā irimasīrī sīrīrē gāāmea. Irasirirā gajerā Jesucristore buremurārē ĩgūrē buremunemomakū irimasīrīrē buro gāāmeaka!

¹³ Irasirig_u sug_u gaji masā ya werenírī merā werenímasībirikereg_u werenígūno Marīpure: “Y_u werenírīrē gajerārē: ‘Āsū ārīduaro yáa’, ārī were-makū iritamuka y_ure!” ārī sērēburo. ¹⁴ Y_u gaji masā ya werenírī merā werenímasībirikereg_u werenírī merā Marīpure sērēgū, Ōāgū deyomarīgū gūñarī sīrī merā sērēa. Irasū sērēkereg_u, gūñarī merā y_u sērēadeare: “Āsū ārīduaro irikoa”, ārī pémasībirikoa. ¹⁵ Irasirirā āsū iriro gāāmea. Ōāgū deyomarīgū turari merā gaji masā ya werenírī merā Marīpure sērērō gāāmea. Irasū āārīmakū, pémasīrī merā marī ya werenírī merā Marīpure sērērō gāāmea. Ōāgū deyomarīgū turari merā gaji masā ya werenírī merā Marīpure bayapeoro gāāmea. Irasū āārīmakū,

pémasĩrĩ merã marĩ ya werenĩrĩ merã Marĩpũre bayapeoro gããmea. ¹⁶ Marĩ Ōãgũ deyomarĩgũ turari merã gaji masã ya werenĩrĩ merã Marĩpũre usuyari sũkerepũũ, marĩ merã ããrĩrã pébiribokuma. Īgũsã irire pémerã: “Irasũta ããrã”, ãrĩ, marĩ merã Marĩpũre usuyari sũbiribokuma. ¹⁷ Marĩ gaji masã ya werenĩrĩ merã Marĩpũre usuyari sũrĩ ōãgorãa. Irasũ ããrĩkerepũũ, marĩ merã ããrĩrã gapũ marĩ werenĩrĩrẽ pébirimakũ, marĩ Īgũsãrẽ Jesucristore bũremunemomakũ iribirikoa. ¹⁸ Gaji masã ya werenĩrĩ merã werenĩmasũbirikeregũ werenĩrĩrẽ yũta mũsã ããrĩpererã nemorõ werenĩa. Irire irisĩã, Marĩpũre usuyari sũa. ¹⁹ Irasũ ããrĩkeregũ, Jesúre bũremurã nerẽrõgue gaji masã ya werenĩrĩ merã wãri mũsã pébirire yũ weremakũ mũsãrẽ ōãbirikoa. Mũsã pémasĩrĩrẽ yũ mérĩgã weremakũ gapũ, mũsãrẽ ōãrokoka.

²⁰ Yaarã, majĩrã pémasĩmerã irirosũ gũñabirikõãka! Mũrã irirosũ ōãrõ pémasĩrĩ merã gũñaka! Nẽrõ iriri gapũre majĩrãgã gũñamerã irirosũ ããrĩka! ²¹ Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Marĩ Opũ ãsũ ãrĩmi: ‘Gajero marãrẽ Īgũsã ya werenĩrĩ merã i makã marãrẽ weredoregũra. Yaare Īgũsãrẽ irasũ weredorekerepũũ, i makã marã yũre neõ bũremubirikuma’, ãrĩmi marĩ Opũ”, ãrĩ gojasũdero ããrĩbũ. ²² Irasirigũ Marĩpũ gajero marãrẽ Īgũsã ya werenĩrĩ merã Īgũrẽ bũremurãrẽ weredoregũ, Īgũsã Īgũrẽ bũremubirire ĩmumi. Īgũrẽ bũremurã gapũre irasiribemi. Īgũyare Īgũ weredorerosũ wererã merã Īgũsãrẽ weremi. ²³ Irasirirã mũsã Jesúre bũremurã nerẽrõgue

gaji masã ya werenírĩ merã werenímasĩbirikererã werenírĩrẽ müsã ããrĩpererã wereníbokoã. Músã irasũ werenímakũ, Marĩpũyare masĩmerã, gajerã Jesúre bũremumerãde ñajãjabokuma. Músã irasũ werenírĩrẽ pérã, müsãrẽ: “Niãrĩmasã ããrĩma”, ãrĩbokuma. ²⁴ Músã ããrĩpererã Marĩpũ weredorerosũ weremakũ Marĩpũyare masĩbi, Jesúre bũremubide ñajãri pégu, ìgũ ñerõ irideare masĩgũkumi. Irasirigu ìgũ ñerĩ irideare bujaweregũkumi. ²⁵ Ìgũ gũñarĩgue ñerõ: “Ñerĩrẽ gũñayo yu”, ãrĩ pémasĩgũkumi. Irasirigu ñadukũpuri merã ejamejã, Marĩpũre: “Yu Opũ ããrã”, ãrĩ bũremugũkumi. Irasũ ããrĩmakũ: “Marĩpũ diayeta müsã merã ããrĩmi”, ãrĩ masĩgũkumi.

Músã nerẽrã, goepeyari merã òãrõ keoro irika! ãrĩ gojadea

²⁶ Yaarã, müsãrẽ ãsũ ãrĩ werea. Músã nerẽmakũ, surãyeri Marĩpũre bayapeoma. Gajerã Marĩpũyare buema. Gajerã Marĩpũ ìgũyare ìgũsãrẽ masĩmakũ irideare werema. Gajerã gaji masã ya werenírĩ merã werenímasĩbirikererã wereníma. Gajerã iri werenírĩrẽ: “Ãsũ ãrĩduaro yãa”, ãrĩ werema. Irasirirã ããrĩpereri irire müsã Jesúre bũremurã òãrõ keoro irika, müsã ìgũrẽ bũremunemoburosũta! ²⁷ Irasirirã gaji masã ya werenírĩ merã werenímasĩbirikererã werenírã, pérã, o urerã wereníburo. Sugũ werení odoadero pũrũ, gajigu wereníburo. Pũrũ gajigu ìgũsã werenírĩrẽ: “Ãsũ ãrĩduaro yãa”, ãrĩ wereburo. ²⁸ Músã nerẽmakũ, ìgũsã werenírĩrẽ: “Ãsũ ãrĩduaro yãa”, ãrĩ werebu marĩmakũ, gaji masã ya merã wereníbirikõãburo. Ìgũsã seyaro ìgũsã gũñarĩgue

Marĩpũ merã werenĩburo. ²⁹ Marĩpũ weredorerosũ wererãde, pẽrã, o ƣrerã wereburo. Irasũ keoro weremakũ pẽrã, gajerã ãgũsã wererire: “Diayeta Marĩpũya kereta ããrã”, ãrĩburo. ³⁰ Mũsã nerẽrõgue sugũ weremakũ, Marĩpũ gajigũre irogue doagũre weredoremakũ, werepũroriadi gapũ toeburo. ³¹ Mũsã irasũ irirã, mũsã ããrĩpererã Marĩpũ weredorerosũ weremasĩrãkoa. Sugũ werepũroriadi were odoadero pũrũ, gajigũ werewãgãnaburo. Irasirimakũ, ããrĩpererã pé, õãrõ yũpũrãkũrãkuma. ³² Marĩpũ weredorerosũ wererã mũsã wereburi dupuyuro: “¿Naásũ ããrĩmakũ irire wererãkuri?” ãrĩ gũñapũroriro gããmea. ³³ Marĩ nerẽmakũ, Marĩpũ marĩrẽ keoro irimakũ gããmemi. Noó gããmerõ iriro marĩrõ ƣsũyari merã nerẽmakũ gããmemi. ããrĩpererogue Jesũre bũremurã nerẽrãrẽ irasũ dita irimakũ gããmemi.

³⁴ Jesũre bũremurã nerẽmakũ, nome werenĩbirikõãburo. Nomerẽ werenĩdoreri máa. Werenĩrõnorẽ irirã, Marĩpũya werenĩrĩ gojadea pũgue dorederosũta õãrõ péro gããmea. ³⁵ Jesũre bũremurã nerẽmakũ, sugo nomeõ werenĩgõ, gũyasĩũrõ iribokumo. Irasirigo igo gajino õãrõ pébiradeare masĩdũago igoya wiigue igo marãpũre sãrẽñaburo.

³⁶ Ire mũsã masĩka! Mũsã Marĩpũya kerere werepũrorinerã ããrĩbea. Irasũ ããrĩmakũ, mũsã dita ãgũyare bũremurã ããrĩbea. Gajerãde ãgũrẽ bũremurã ããrĩma. ³⁷ Sugũ mũsã merãmũ: “Yũ Marĩpũ weredorerosũ weregũ ããrã”, ãrĩ gũñagũ, o gajigũ: “Yũ Õãgũ deyomarĩgũ irimasĩrĩ sĩrĩrẽ opãa”, ãrĩ gũñagũ, i yũ mũsãrẽ gojarire: “Marĩ Opũ

doreri ããrã”, ãrĩ masĩgũkumi. ³⁸ Yũ gojarire: “Marĩ Opũ doreri ããrĩbea”, ãrĩmakũ, ĩgũrẽ: “Marĩpũyare weregũ ããrĩbemi”, ãrĩka!

³⁹ Yaaã, Marĩpũ weredorerosũ weremasĩrĩrẽ buro gããmeke masã! Masã merãmarãrẽ ĩgũsã gaji masã ya merã werenĩmasĩbirikererã werenĩmakũ: “Werenĩmerãta!” ãrĩbirikõãka! ⁴⁰ Masã nerẽrã, noó gããmerõ iribirikõãka! Goepeyari merã ããrĩpereri masã iririre õãrõ keoro irika!

15

Cristo masãdeare gojadea

¹ Yaaã, yũ masãrẽ iripoegue weredeã, Jesu-cristo masakare tauri kerere daporare gũñamakũ gããmeã. Masã irire pérã, bũremubũ. Daporadere irire bũremuníkõãã. ² Masã iri kerere bũremusiã, peamegue waamurã meta ããrã. Iri kerere masãrẽ yũ weredeare bũremurĩrẽ piribirimakũ, Marĩpũ masãrẽ taugũkumi. Masã iri kerere bũremubirinerã, diayeta tausũbiribokoa.

³ Yũre buedeare masãrẽ weretaubũ. Iri bueri, gaji bueri nemorõ õãtaria. ãsũ ããrã. Marĩpũya werenĩrĩ gojadea pũgue gojaderosũta Cristo marĩ ñerõ iridea waja marĩrẽ boabosadi ããrĩmĩ.

⁴ ĩgũ boadero pũrũ, ĩgũrẽ yãanerã ããrĩmã. Pũrũ Marĩpũya werenĩrĩ gojadea pũgue gojaderosũta urenũ waaró merã Marĩpũ ĩgũrẽ masũdi ããrĩmĩ.

⁵ ĩgũrẽ masũdero pũrũ, Cristo Pedrore deyoayupũ. Pũrũ ĩgũ buedoregũ pĩnerã, pe mojõma pere su gubu peru pẽrẽbejarãrẽ deyoayupũ. ⁶ Pũrũ suñarõ wãrã quinientos masaka nemorõ ĩgũrẽ bũremurãrẽ deyoayupũ. Wãrã ĩgũrẽ ĩãnerã okama

dapa. Gajerã boasianerã ããrĩmá. ⁷ Pɔɔɔ Santiagore deyoayurɔ. Iro pɔɔ ããrĩpererã ãgũ buedoregɔ pĩnerãrẽ deyoayurɔ.

⁸ ããrĩpererã gajerãrẽ ãgũ deyoadero pɔɔ, yɔdere deyoatũnumi pama. Majĩgũgã keoro deyoabigã deyoadi irirosũ yɔ ããrĩkeregɔ, Jesúre bɔremutɔyáa. ⁹ ãgũ yɔre deyoaburi dupuyurogue ãgũrẽ bɔremurãrẽ ñerõ irigorenaba. Irasirigɔ gajerã Jesús buedoregɔ pĩnerã ããrĩpererã dokague ããrã. Masaka yɔre: “ãgũ Jesús buedoregɔ pídi ããrĩmi”, ãrĩmakũ: “Yɔ Jesús buedoregɔ píbodi ããrĩbiradibɔ”, ãrĩ gũñáa. ¹⁰ Irasũ ããrĩkerepɔɔ, Marĩpɔ yɔre òãrõ iritamumi. Irasirigɔ Jesucristo yɔre ãgũyare buedoregɔ pími. Marĩpɔ yɔre ubugora òãrõ iritamugũ meta yámi. Yɔ ããrĩpererã gajerã Jesucristo buedoregɔ pĩnerã nemorõ moãa. Yɔ gũñarĩ merã irasiribea. Marĩpɔ yɔre òãrõ iritamugũ, yɔ merã ããrĩníkõãmi. Yɔre ãgũ iritamurĩ merã òãrõ moãmakũ yámi. ¹¹ Yɔ bueri, gajerã Jesucristo buedoregɔ pĩnerã bueri irirosũta ããrã. Gɔa ããrĩpererã Jesucristo boa, masãdea kerere buea. I kerere pérã, mɔsã ãgũrẽ bɔremunagãbɔ.

Boanerã masãburire gojadea

¹² Gɔa, Cristo boa, masãdeare buekerepɔɔ, gajerã mɔsã merã ããrĩrã: “Boanerã neõ masãbirikumã”, ãrĩma. ¿Nasirirã irasũ ãrĩrĩ ire? ¹³ Boanerã masãburi marĩmakũ, Cristode masãbiribodi ããrĩmi. ¹⁴ Cristo masãbirimakũ, gɔa bueri neõ wajamarĩbokoã. Mɔsã ãgũrẽ bɔremurĩde wajamarĩbokoã. ¹⁵ Marĩpɔ boanerãrẽ masũbi, Cristodere masũbiribodi ããrĩmi. ãgũ irasũ iribirimakũ, gɔa: “Marĩpɔ Cristore masũdi

ããrĩmĩ”, ãrĩrã, ãrĩgatorã iribokuyo. ¹⁶ “Boanerã masãbirikumã”, ĩgũsã ãrĩrĩ diaye ããrĩmakũ, Cristode masãbiribodi ããrĩmĩ. ¹⁷ Cristo masãbirimakũ, ĩgũrẽ musã buremurĩ wajamarĩbokoã. Irasirirã musã ñerĩ iridea waja, waja opakõãbokoã dapa. ¹⁸ Diayeta i irasũ ããrĩmakũ, Cristore buremurã boanerã, ĩgũrẽ buremubirinerã peamegue waamurã irirosũ ããrĩbokuma. ¹⁹ Marĩ Cristore buremurã: “Marĩ okarinurĩ dita ĩgũ merã õãrõ ããrĩrãkoã. Marĩ boadero purũ masãburire masĩña máã”, ãrĩ gũñarã, ããrĩpererã masaka nemorõ boporã ããrĩbokoã.

²⁰ “Cristo boadero purũ, masãdi ããrĩmĩ”, ãrĩrĩ gapũ diaye ããrã. Marĩ ããrĩpererã masaka boadero purũ masãburi dupuyuro masãpuroridi ããrĩmi. ²¹ Æsũ ããrã. Neõgorague ããrĩpuroridi Adán ñerĩ iripuroridea waja marĩ masaka ããrĩpererã boamurã dita ããrã. Purũ Jesucristo õãrĩrẽ iripeodea waja marĩ boadero purũ masãrãkoã. ²² Marĩ masaka ããrĩpererã Adán parãmerã ããrĩturiarã ããrĩrĩ waja boamurã dita ããrã. Cristoyarã marĩ ããrĩmakũ, marĩ boadero purũ, Marĩpurũ marĩ ããrĩpererãrẽ masũgukumi. ²³ Marĩpurũ marĩrẽ keoro masũgukumi. Cristo masãsiadi ããrĩmĩ. Purũ ĩgũ i ãmũgue dupaturi aarimakũ, marĩ ĩgũyarã ããrĩsĩã, masãrãkoã. ²⁴ Irasũ waamakũ, i ãmũ pereakõãrokoã. Irinurẽ Cristo ããrĩpererã ñerãrẽ: oparãrẽ, dorerãrẽ, turarãrẽ béogukumi. ĩgũ irasiriadero purũ, ĩgũ Pagũre ĩgũ ããrĩpererã Opũ ããrĩrĩrẽ wiagukumi. ²⁵ ĩgũ wiaburi dupuyuro Marĩpurũ Cristore ĩãturiã ããrĩpererãrẽ béogukumi. ĩgũsãrẽ béoburi dupuyuro

Marĩpũ gããmederosũta Cristo ããrĩpererã Opũ ããrĩgũkumi. ²⁶ ããrĩpererã ĩgũrẽ ĩãturĩrãrẽ bẽoderopũrũ, boaridere peremakũ irigũkumi. ²⁷ Marĩpũ ĩgũya werenĩrĩ gojadea pũgue ãrĩderosũta Cristore ããrĩpererãrẽ doregũ, ããrĩpererire opagũ ããrĩmakũ iridi ããrĩmĩ. Irasũ ãrĩrõ: “Marĩpũ weka doregũ Cristo ããrĩmĩ”, ãrĩũaro meta yáa. Marĩputa ããrĩpererire, ããrĩpererãrẽ Cristo dokague pídi ããrĩmĩ. ²⁸ Marĩpũ ĩgũrẽ irasiri ododeropũrũ, Cristo Marĩpũ magũ ĩgũ ããrĩpererãrẽ doregũ, ããrĩpereri opagũ ããrĩrĩrẽ Marĩpũre wiagũkumi. Irasirigũ Marĩpũ ããrĩpereri, ããrĩpererã Opũ ããrĩgũkumi.

²⁹ Gaji ããrã. “Boanerã masãbirikuma”, ĩgũsã ãrĩkerepũrũ, ĩnasirĩã gajerã masaka boanerãya ããrĩburire wãĩyebosayuri? ĩgũsã: “Boanerã masãbirikuma”, ãrĩrã, ĩgũsãya ããrĩburire wãĩyebosabiribokuma.

³⁰ Gũa: “Boanerã masãrãkuma”, ãrĩ bueri waja ũmarĩkũ gajerã gũare ñerõ iridũama. Gũare ĩgũsã ñerõ iridũakerepũrũ, boanerã masãburire masĩsĩã, irire buenĩkõãa. ³¹ Yaarã, i diayeta ããrã. Marĩ Opũ Jesucristore mũsã bũremumakũ ĩãgũ, yũ bũro mũyáa. Ide diayeta ããrã. ũmarĩkũ: “Masaka yũre wẽjẽkõãrãkuma”, ãrĩ péñãa. ³² Yũ Jesucristoya kerere bueri waja Efesoguere makãnúũ marã yéa bũro guarã irirosũ ããrĩrã, yũre ñerõ irima. “Boanerã masãbirikuma”, ĩgũsã ãrĩrĩ diaye ããrĩmakũ, yũ iroguẽ bueri waja ñerõ taridea wajamarĩbokuyo. “Boanerã masãbirikuma”, ĩgũsã ãrĩrĩ diaye ããrĩmakũ, marĩde gajerã irirosũ ãsũ ãrĩ werenĩbokoa: “Nãka baa, iirĩrã! Ñamigã boakõãbokoa. Irasirĩã marĩ boaburi dupuyuro

marĩ gããmerõ irirã!” ãrĩboko.

³³ Gajerã ãrĩgatorire pébirikõãka! Masaka ãsũ ãrĩ werewhakuma: “Ñerãrẽ wapikurã, musã õãrõ iririkurire pirikõãrãkoa”. ³⁴ Írasirirã musã dupuyurogue gopeyari merã keoro iriderosũta irika doja! Ñerĩrẽ irinemobirikõãka! Musã surãyeri Marĩpũre masĩbea. Musãrẽ gũyasĩrĩdoregũ irasũ ãrã.

Boanerã masãburire gojanemodea

³⁵ Gajipoe sugũ ãsũ ãrĩ sãrẽñabokumi: “¿Nasiri boanerã masãrãkuri? ¿Naásũperi dupũ oparãkuri?” ãrĩbokumi. ³⁶ Irasũ sãrẽñagũ pémasĩbi ããrĩmi. Marĩ oteri yeri otedero pũrũ, iri yeri puriburi dupuyuro yeba poekague boakõãkoa. Boa, pũrũ puri wirikoa. Boabirimakũ, neõ puri wirimasĩbirikoa. ³⁷ Marĩ oterã, puridiguere ãĩ otebea. Dupayeri direta otea. Iri yeri trigo yeri ããrĩrõ, o gaji yeri ããrĩrõ ããrĩkoa. ³⁸ Iri yerire marĩ otedero pũrũ, Marĩpũ gapũ ãgũ gããmederosũta iri yerire purimakũ yãmi. Irasirigũ ojodũka yerire ojodũkañũ waamakũ yãmi. Trigo yerire trigo sari waamakũ yãmi. Irasũ dita yãmi Marĩpũ. ³⁹ ããrĩpererã okari oparã sũrosũ dupũkurã ããrĩbema. Masakaya dupũ, waimũrãya dupũ irirosũ ããrĩbea. Mirãya dupũ, waaiya dupũ irirosũ ããrĩbea. ⁴⁰ Ũmarõ marãya dupũ, i ũmũ marãya dupũ irirosũ ããrĩbea. Ũmarõ marã õãrĩ dupũ opama. I ũmũ marã, ũmarõ marã irirosũ ããrĩbirikererã, ãgũsãde õãrĩ dupũ opama. ⁴¹ Abe ũmũmũ kũmijũrĩ merã asimi. Ñamimũ irirosũ boyobemi. Neñukãde gajerosũperi gosema. Neñukãrẽ marĩ ããmakũ, gajerã sĩrũgã goserã deyoma. Gajerã bũro goserã deyoma.

⁴² Marĩ boanerã masãrã ãsũ ããrĩrãkoa. Marĩ boamakũ yáadero pũrũ, marĩya dupũ boarokoa. Pũrũ masãrã, gaji dupũ neõ boabiri dupũ oparãkoa. Irasirirã neõ dupaturi boabiriko. ⁴³ Marĩya dupũre yáamakũ, boanerãya dupũ boari dupũ, turabiri dupũ daro ããrã. Marĩpũ marĩrẽ masũmakũ, marĩya dupũ õãrĩ dupũ, turari dupũ ããrĩrokoa. ⁴⁴ Marĩya dupũre yáamakũ, marĩya dupũ i ãmũma dupũ ããrã. Marĩ boanerã masãmakũ, marĩya dupũ ãmũgasima dupũ ããrĩrokoa. Irasirirã ãsũ ãrĩ masĩa. Daporare marĩ i ãmũma dupũre opáa. Pũrũ ãmũgasima dupũre oparãkoa.

⁴⁵ Marĩpũya werenĩrĩ gojadea pũgue ãsũ ãrĩ gojasũdero ããrĩbũ: “Marĩpũ ĩgũ iripũroridi Adãrẽ okarire sĩdi ããrĩmĩ”, ãrĩ gojasũdero ããrĩbũ. Adán pũrũmũ Jesucristo gapũ perebiri okarire sĩgũ ããrĩmĩ. ⁴⁶ Marĩ i ãmũma dupũre opapũroria. Pũrũguere ãmũgasima dupũre oparãkoa. ⁴⁷ I ãmũgue ããrĩpũroridi Adán, nikũ merã irisũdi ããrĩmĩ. ĩgũ pũrũmũ marĩ Opũ Jesucristo gapũ ãmũgasiguemũ ããrĩmĩ. ⁴⁸ Adán nikũ merã iridea dupũ dupũkũderosũ marĩ ããrĩpererã nikũ merã iridea dupũ dupũkũa. Irasũ ããrĩmakũ, ãmũgasiguemũ Jesucristoyarã ããrĩsĩa, ĩgũya dupũ irirosũ dupũkũrãkoa. ⁴⁹ Adán nikũ merã irisũdi ããrĩmĩ. Marĩ ĩgũ irirosũ dupũkũa. Pũrũ ãmũgasiguemũ Cristo irirosũ dupũkũrãkoa.

⁵⁰ Yaaã, mũsãrẽ ire werea. Marĩrẽ i ãmũma dupũ merã ãmũgasigue Marĩpũ ĩgũyarãrẽ dorerogue neõ waamasĩña máa. I ãmũma boaburi dupũ merã ãmũgasigue perebiri okari ããrĩrõguere neõ waamasĩña máa. ⁵¹⁻⁵² Masaka masĩbirideare daporare mũsãrẽ weregũra. Jesucristo i

ũmague dupaturi aariburi dupuyuro ããrĩpererã ãgũyarã boabirikuma. Jesucristo aarĩripoe Marĩpũre wereboegũ puriduru puritũnugakumi. Irasũ puriadero pũũ, mata kãrĩ yoberã irirosũ marĩ ããrĩpererã Jesucristore bũremurã gorawayurãkoa. Marĩ boanerã gaji dupũ boabiri dupũ merã masãrãkoa. Irasirirã neõ dupaturi boabirikoã. Okarãde gaji dupũ boabiri dupũ oparãkuma. ⁵³ Marĩpũ marĩya dupũ pereburi dupũre gorawayugakumi, perebiri dupũre opaburo, ãrĩgũ. Marĩya dupũ boaburi dupũre gorawayugakumi, neõ boabiri dupũre opaburo, ãrĩgũ. ⁵⁴ Marĩya dupũ pereburi dupũ, neõ perebiri dupũre gorawayumakũ, marĩ boaburi dupũ, neõ boabiri dupũre gorawayumakũ, Marĩpũya werenĩrĩ gojadea pũgue ãrĩderosũta waarokoa. Æsũ ãrĩ gojasũdero ããrĩbũ iri pũguere: “Marĩpũ boarire bẽokõãmi, dupaturi marĩrẽ neõ boabirikõãburo, ãrĩgũ. ⁵⁵ Marĩ boakõãrãkoa, ãrĩ gũidea pereakõã”, ãrĩ gojasũdero ããrĩbũ. ⁵⁶ Marĩ ñerõ iridea waja boamurã dita ããrã. Marĩpũ Moisére doreri pídea merã marĩ ñerõ irideare masĩa. ⁵⁷ Irasũ ããrĩkerepũũ, Marĩpũ marĩ Opũ Jesucristo iridea merã marĩrẽ peamegue waabonerãrẽ taumi. Irasirirã Marĩpũre: “Õãtaria mũ”, ãrĩ, mũsũyari sĩa.

⁵⁸ Irasirirã, yaarã yũ maĩrã, mũsãrẽ ãsũ ãrĩ weregura. Mũsã marĩ Opũ Jesucristore bũremurĩrẽ neõ piribirikõãka! Gajerã mũsãrẽ ãgũyare bẽodoremakũ, neõ bẽobirikõãka! Æmũrikũ ãgũ moãdorerire õãrõ irinĩkõãka! Ire marĩ masĩa. ãgũ merã marĩ õãrõ ããrĩrã ãgũ marĩrẽ moãdorerire irimakũ, marĩ moãrĩ, ubu ããrĩrĩ neõ ããrĩbea.

16

Corinto marã gajerã Jesúre b̄remurãrẽ niyeru s̄iburi neeõrĩrẽ gojadea

¹ Daporare m̄sãrẽ niyeru neeõ, m̄sã gajerã Jesúre b̄remurãrẽ s̄iburire weregura. Ȳu gajerã Jesúre b̄remurãrẽ Galacia nikũgue ããrĩrãrẽ dorederosũta m̄sãde irika! ² Semanariku siuñajãrĩnu* ããrĩmakũ, ããrĩpererã m̄sã gajerã Jesúre b̄remurãrẽ s̄iburi niyerure dukawa duripíka! Mérõgã oparã mérõgã dukawa duripíka! Waawayaro oparã waawayaro dukawa duripíka! Irasirirã, ȳu m̄sã p̄rogue ejamakũ, m̄sã s̄iburire opasiarãkoa. ³ Ȳu m̄sã p̄rogue ejagu, m̄sã beyenerãrẽ Jerusalẽgue iriugukoa. Pãpera pũgue ãsũ ãrĩ gojagukoa: “Iĩsã ããrĩma Corinto marã beyenerã”. Irasũ ãrĩ goja odo, Iğũsã merã iri pũrẽ, m̄sã duripí neeõdea niyerure iriugukoa, Jesúre b̄remurã Jerusalẽgue ããrĩrãrẽ s̄idoregu. ⁴ M̄sã yure: “Iğũsã merã waamakũ gããmea”, ãrĩmakũ, Iğũsã ȳu merã waarãkuma.

Pablo Iğũ Corintogue waaburire gojadea

⁵ Ȳu m̄sã p̄rogue waagú, Macedonia nikũgue waap̄rorigukoa. Irore tariwãgã, m̄sã p̄ro waagukoa. ⁶ Gajipoe irigu yoawayaripoe m̄sã merã ããrĩgukoa, o gajipoe irigu puibure ããrĩpeogu, ããrĩpeokõãbokoa. Irasirirã m̄sã ȳu gajerogue waaburire iritamumasĩrãkoa. ⁷ Ȳu m̄sãrẽ Iãrĩ dita Iãtariad̄abiriko. Irasirigu marĩ Op̄u gããmemakũ, yoaripoe m̄sã merã ããrĩgukoa. ⁸ Pentecostés

* **16:2** Jesúre b̄remurãya siuñajãrĩnu, domingo ããrã. Domingo ããrĩmakũ, Jesús boadigue masãdi ããrĩmĩ. Irasirirã, domingo ããrĩmakũ, Iğũrẽ b̄remurã nerẽnama.

bosenu ããrĩmakũ, õõ Efesogueta taugũkoa dapa. ⁹ Õõguere wári moãrĩ ããrã. Marĩ Opũya kerere péduarã wárã ããrĩma. Irasũ ããrĩmakũ, yu irire weremakũ kãmutaduarãde wárã ããrĩma.

¹⁰ Timoteo musã pũrogue ìgũ ejamakũ, ìgũrẽ õãrõ merã bokatĩrĩ, õãrõ usũyari merã ñeãka! Musã irasirimakũ, ìgũ musã merã bujawereri marĩrõ ããrĩgukumi. Ìgũ yu irirosũ marĩ Opũyare moãmi.

¹¹ Irasirirã ìgũrẽ irasũ ìãbéomerãta õãrõ merã ìgũrẽ iritamuka! Musã irasirimakũ, ìgũ yu pũrogue õãrõ usũyari merã goedujarigukumi. Gajerã Jesúre buremurã merã gũa ìgũrẽ yũrã yáa. Irasirirã, ìgũ õõgue aariburire iritamuka!

¹² Apolore marĩyagu Jesúre buremugũrẽ musãrẽ ìãgũ waamakũ buro gããmeadibu. Irasirigu ìgũrẽ gajerã Jesúre buremurã merã waadoreadibu. Yu waadorekererũ, ìgũ daporare waadũabemi. Pũru ìgũrẽ gajino iriri marĩmakũ, musã pũrogue waagukumi.

Pablo Corinto marãrẽ õãdoretũnudea

¹³ Õãrõ pémasĩka! Jesucristore buremurĩrẽ neõ piribirikõãka! Gũiri marĩrõ õãrõ gũñaturarã ããrĩka! Marĩpũ turari merã õãrõ ããrĩrikuka! ¹⁴ Æãrĩpereri gajinorẽ irirã, gajerãrẽ maĩrĩ merã irika!

¹⁵ Yaarã, musã masĩa. Acaya nikũguere Estéfanas wãikũgũya wii marã, gajerã iro marã Jesúre buremupũroriburi dupuyuro ìgũrẽ buremupũrorinerã ããrĩma. Ìgũsã, gajerã Jesúre buremurãrẽ õãrõ iritamuníkõãma. ¹⁶ Ìgũsã irirosũ irirãrẽ õãrõ ìgũsã dorerire iritũyaka! Gajerã ìgũsã merã Jesucristoyare moãtamurãrẽ musã õãrõ ìgũsã dorerire iritũyamakũ gããmea yu. ¹⁷ Musã

merãmarã Estéfanos, Fortunato, Acaico yu p̄rogue ejasiama. Īgūsã yu merã ããrĩmakũ, b̄uro us̄yáa. Īgūsã musã yu ire itamuboadere iritamuma.
 18 Yu ire ããrĩ yu ĵ̄p̄rãk̄makũ yáma. Musãdere irasũta iriñurã. Musãrẽ gajerã p̄rogue Īgūsã irirosũ irirãrẽ: “Õãrõ irirã yáma”, ãrĩ werero gããmea.

19 Asia nikũ marã Jesúre b̄remurã musãrẽ õãdorema. Aquila, Priscila, gajerã Jesúre b̄remurã Īgūsãya wiigue nerẽnarãde musãrẽ b̄uro õãdorema.
 20 Õõ marã Jesúre b̄remurã ããrĩpererã musãrẽ õãdorema. Us̄yari merã gãme bokatĩrĩ, ããrõ merã mojõ ñeãnaka!

21 Yu Pablo, yu basi: “Musãrẽ õãdorea”, ãrĩ gojáa.

22 Marĩ Op̄re Jesucristore maĩbino wajamoãsb̄uro. “Gua Op̄u aarika!”

23 Marĩ Op̄u Jesucristo musãrẽ ããrõ iritamuburo.

24 Marĩ ããrĩpererã Jesucristoyarã ããrã. Irasiriḡu yu musã ããrĩpererãrẽ b̄uro maĩa. Æsũ ããrã. Irasũta ããrĩburo.

Iropãta ããrã.

Pablo

Marĩpuya Kerere Wereri Turi New Testament in Siriano

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siriano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 22 Feb 2024 from source files
dated 29 Jan 2022
1a0774e8-d152-5929-891b-95e0d2238786